

XVI BROJ ČASOPISA



ZLATNO pero



VI
OSNOVNA ŠKOLA
MOSTAR

PIŠEMO O ONOME
ŠTO VOLIMO!

DOBRODOŠAO
SELEKTORI

I KRVI SVOJU ZA BOSNU MOJU
BOSNA I HERCEGOVINA

MI SMO GENERACIJA
KOJA SANJA,
UČI I MIJENJA
SVIJET!

TAKMIČENJA
AKTIVNOSTI
INTERVJUI
KREATIVNI KUTAK
IZLETI
EKSKURZIJA

NAŠ GLAS. NAŠE IDEJE. NAŠE PERO.

Kroz stranice OVOG BROJA



Stranice ispunjene uspjesima, uspomenama
i pričama naše škole.

	RIJEČ REDAKCIJE Uvodna riječ naše redakcije.	03
	RAZGOVOR S POVODOM Zanimljive priče i inspirativni sagovornici.	04
	PEDAGOŠKO-PSIHOLOŠKI KUTAK Podrška, razumijevanje i savjeti za naše učenike.	07
	UČENIK GENERACIJE Put uspjeha ispisan znanjem i radom.	09
	MATURANTI Naša generacija, naši snovi, naš put dalje.	11
	ŠKOLSKE AKTIVNOSTI Događaji koji obogaćuju naš školski život.	13
	STRUČNO USAVRŠAVANJE NASTAVNIKA Učenje koje traje – za bolje sutra.	54
	TAKMIČENJA I KONKURSI Uspjesi koji nas čine ponosnim.	57
	ART STRANICE Kreativnost kroz riječi i boje.	86
	EKSKURZIJA I IZLETI Putovanja koja se pamte.	91
	ODJELJENJA U ŠKOLSKOJ 2025./2026. Svako odjeljenje nosi svoju posebnu priču.	96



RIJEČ

redakcije



Dragi čitaoci,

Dobro došli u XVI izdanje školskih novina
JU „VI osnovne škole” Mostar!

I ove školske godine vrijedni učenici i nastavnici pripremili su stranice ispunjene
znanjem, kreativnošću i uspjesima.

Kroz priče, intervjue, pjesme, likovne i literarne radove donosimo vam sliku naše
škole onakvu kakva ona zaista jeste — radosnu, maštovitu i uvijek u pokretu.

Posebno mjesto zauzimaju devetaši, koji se opraštaju od školskih klupa i sjećanja
koja će ih pratiti na njihovom daljem putu.

Na ovim stranicama pronaći ćete najljepše trenutke iz učionica, sportske i
takmičarske uspjehe, putovanja i druženja, kao i one male, svakodnevne radosti
koje čine školu mjestom na kojem se raste i uči, ali i mjestom gdje nastaju
prijateljstva za cijeli život.

Nadamo se da ćete uživati u svakom retku i da će vas naš školski list podsjetiti
koliko je lijepo biti dio zajednice kakvu čini JU „VI osnovna škola” Mostar.



REDAKCIJA



Direktorica: Edna Isić-Balić

Nastavnici: Mersiha Šuta, Elvedina Kazazić

Lektori: Mirhunisa Idrizović i Selma Mujan

Učenici: Nedim Agić, Farah Mahić, Zara Vejzović, Sara Macić, Merjem
Memić, Ada Lakišić, Nea Ćurić, Tajra Šašković, Ema Ahmić, Anida
Duraković, Naila Vele, Isar Elezović, Zara Jusupović, Zara Ćurić, Nadia
Mišić, Edin Đukić, Benjamin Peco, Una Katica, Nadia Kurt, Dalia Kurt.
Grafički dizajn: Mersiha Šuta, Nedim Agić i Farah Mahić



Adresa: Alekse Šantića br. 10, Mostar



Telefon: 036/580-288



E-mail: sestaosnovnamostar@gmail.com



Web stranica: www.sestaosnovna.ba



Razgovor s povodom

VIZIJA ŠKOLE KROZ RAZGOVOR
S DIREKTORICOM

U novom broju školskog časopisa „Zlatno pero” razgovarali smo s našom direktoricom Ednom Isić-Balić o izazovima obrazovanja, važnosti zajedništva i planovima za budućnost. Njene riječi su inspiracija za sve nas.



DIREKTORICA ŠKOLE

Edna Isić-Balić

1. Kada biste morali opisati našu školu u tri riječi, koje bi to riječi bile i zašto?

Našu školu bih opisala kao zajedništvo, znanje i razvoj. Zajedništvo jer svakodnevno gradimo odnose zasnovane na međusobnom poštovanju i podršci. Znanje jer je ono temelj svega što radimo. Razvoj jer nastojimo da svaki učenik i svaki nastavnik svakog dana napravi korak naprijed.

2. Šta Vas je najviše iznenadilo otkako ste preuzeli dužnost direktorice?

Iako sam školu dobro poznavala kao nastavnica, iznenadila me širina odgovornosti koju nosi funkcija direktorice. S druge strane, posebno me obradovala spremnost kolega, učenika i roditelja na saradnju kada radimo za zajednički cilj.

3. Koji trenutak iz ove školske godine biste izdvojili kao posebno emotivan ili značajan?

Posebno su me obradovali uspjesi naših učenika na takmičenjima i školskim manifestacijama. Međutim, najemotivniji su trenuci kada vidite učenika koji je prevazišao vlastite prepreke i ostvario napredak. Takvi uspjesi imaju posebnu vrijednost.

4. Kako danas izgleda dobra škola i po čemu se naša škola izdvaja?

Dobra škola nije samo mjesto gdje se stiče znanje, već mjesto gdje se razvijaju karakter, odgovornost i osjećaj pripadnosti. Vjerujem da se naša škola izdvaja po predanosti nastavnika, uspjesima učenika i pozitivnoj atmosferi koju zajedno stvaramo.

5. Šta učenici možda ne znaju o poslu direktorice, a voljeli biste da znaju?

Možda ne znaju da iza svakog školskog dana stoji mnogo planiranja, organizacije i donošenja odluka. Ipak, najvažnije je da svaka odluka koju donosimo ima za cilj da učenicima omogući što bolje uslove za učenje i razvoj.

6. Kada razgovarate s učenicima, šta Vas najviše raduje, a šta Vas zabrinjava?

Raduje me njihova kreativnost, iskrenost i spremnost da izraze svoje ideje. Zabrinjava me što ponekad ne vjeruju dovoljno u svoje sposobnosti i što su izloženi brojnim pritiscima modernog vremena.

7. Koliko su učenici uključeni u donošenje odluka i kreiranje života škole?

Trudimo se da njihov glas bude važan kroz Vijeće učenika, različite projekte i aktivnosti. Smatram da učenici najbolje osjećaju potrebe svoje generacije i zato želimo da budu aktivni učesnici školskog života.

8. Koji uspjeh škole smatrate najvažnijim, a da nije vezan za ocjene i takmičenja?

Najvećim uspjehom smatram kada škola bude mjesto u kojem se učenici osjećaju sigurno, prihvaćeno i sretno. Takvo okruženje je temelj za svaki drugi uspjeh.

9. Kako motivisati učenike u vremenu kada im pažnju privlače društvene mreže i tehnologija?

Tehnologiju ne treba posmatrati samo kao izazov nego i kao priliku. Ključno je nastavu učiniti zanimljivom, povezati gradivo sa stvarnim životom i pokazati učenicima da znanje otvara vrata koja nijedna društvena mreža ne može zamijeniti.

10. Šta biste voljeli da svaki učenik ponese iz naše škole, osim znanja iz udžbenika?

Voljela bih da ponesu samopouzdanje, osjećaj odgovornosti, poštovanje prema drugima i uvjerenje da mogu ostvariti svoje ciljeve ako vrijedno rade.

11. Koju osobinu najviše cijenite kod nastavnika?

Predanost. Nastavnik koji vjeruje u svoje učenike i ulaže trud da ih motiviše ostavlja trag koji se pamti cijeli život.

12. Kako graditi školu u kojoj se učenici osjećaju sigurno, prihvaćeno i motivisano?

Kroz otvorenu komunikaciju, međusobno poštovanje i saradnju svih učesnika odgojno-obrazovnog procesa. Kada učenici znaju da ih neko sluša i razumije, osjećaju se sigurnije i spremnije za napredak.

13. Postoji li neki savjet koji ste dobili na početku karijere, a koji Vas i danas vodi?

Jedan savjet koji pamtim glasi: „Svako dijete zaslužuje priliku da pokaže svoj potencijal.“ Taj princip nastojim slijediti i danas.

14. Da možete pokrenuti jedan veliki projekat bez finansijskih ograničenja, šta biste prvo uradili za školu?


Uložila bih u savremene učionice, laboratorije, sportsku infrastrukturu i prostore za kreativni rad učenika. Djeca zaslužuju okruženje koje podstiče učenje, istraživanje i razvoj talenata.

15. Gdje vidite JU „VI osnovnu školu“ Mostar za pet godina?

Vidim je kao još moderniju, prepoznatljivu školu koja njeguje kvalitetno obrazovanje, inovacije i partnerski odnos sa roditeljima i lokalnom zajednicom, uz zadržavanje vrijednosti po kojima je danas poznata.

16. Na šta ste najponosniji kada su u pitanju naši učenici?

Ponosna sam na njihovu upornost, uspjehe koje postižu i način na koji predstavljaju školu. Još više me raduje kada pokažu humanost, solidarnost i poštovanje prema drugima.




Đuša naše škole

INTERVJU SA SEKRETAROM ŠKOLE INDIROM OBRADOVIĆ

Postoje ljudi koji godinama tiho grade jednu školu, ne tražeći pohvalu, a ipak postanu njen neizostavan dio. Naša sekretarica je uz ovu školu od njenog samog početka — od prvih školskih zvona, prvih generacija učenika, pa sve do danas.

Kroz godine rada bila je mnogo više od osobe koja obavlja administrativne poslove. Bila je oslonac nastavnicima, podrška roditeljima i uvijek nasmijano lice koje učenike dočekuje s toplinom i razumijevanjem.

Njena predanost, strpljenje i ljudskost ostavili su trag u hiljadama školskih dana i uspomena. Generacije učenika su odlazile, ali njena dobrota, smirenost i posvećenost ostaju  dio duha naše škole.



“ Školu ne čine zidovi,
nego ljudi koji joj daju dušu. ”

1. Sjećate li se svog prvog dana u našoj školi?

Naravno. Bio je to poseban trenutak ispunjen uzbuđenjem, novim licima i željom da zajedno gradimo školu koja će postati mjesto lijepih uspomena za mnoge generacije.

2. Šta Vam je kroz godine rada ostalo najviše u srcu?

Najviše pamtim učenike i ljude koje sam upoznala. Svaka generacija je donijela nešto posebno, a dječiji osmijesi i iskrena energija uvijek ostanu najljepši dio svakog dana.

3. Kako biste opisali našu školu danas?

Kao mjesto puno života, topline i zajedništva. Škola nije samo prostor za učenje, nego zajednica u kojoj svi zajedno rastemo i stvaramo uspomene.

4. Šta Vas i danas motiviše u poslu?

Lijepa riječ, osmijeh učenika i osjećaj da nekome možete pomoći. Upravo te male stvari daju posebnu vrijednost ovom poslu.

5. Postoji li neka uspomena koju posebno čuvate?

Mnogo ih je. Školske priredbe, uspjesi učenika, zajednička druženja i trenuci kada vidite koliko su djeca sretna — to su uspomene koje ostaju zauvijek.


6. Šta biste poručili današnjim učenicima?

Da uživaju u školskim danima, čuvaju prijateljstva i vjeruju u sebe, jer najljepše uspomene često nastaju upravo u školi.

7. Šta za Vas predstavlja ova škola?

Mnogo više od radnog mjesta. Ova škola je dio mog života, mjesto kojem pripadam i koje nosim u srcu.



Razgovor vodili:
Nedim Agić i Sara Macić 

PEDAGOŠKO psihološka SLUŽBA



“
Naša misija je podrška,
razumijevanje i razvoj
svakog učenika.
”



U našoj školi, pedagoško-psihološka služba ima veoma važnu ulogu. Stručne saradnice koje svakodnevno doprinose razvoju, podršci i dobrobiti školske zajednice su naša pedagog Almira Stranjak-Šašić i psiholog Saudina Udovičić. Njihova uloga nije samo rješavanje trenutnih izazova u školi, nego stvaranje pozitivnog i poticajnog školskog okruženja, unapređenje odgojno-obrazovnog rada škole, saradnja sa učenicima, nastavnicima, roditeljima i drugim saradnicima škole, uvođenje inovacija, stvaranje inkluzivnog okruženja u školi, podsticanje interkulturalnog odgoja, praćenje i analiza uspjeha učenika i realizacije rada škole, profesionalna orijentacija učenika, saradnja sa stručnim organima u školi, rad u učeničkim organizacijama, pedagoško psihološko usavršavanje, saradnja sa društvenom sredinom.



Saradnja i podrška

Vema važan segment rada službe usmjeren je na kontinuiranu saradnju sa učenicima, nastavnicima i roditeljima, s ciljem stvaranja poticajnog, sigurnog i uspješnog odgojno-obrazovnog rada.



Stručni rad i razvoj

Kroz savjetodavni rad, individualne razgovore i različite radionice, stručne saradnice pružaju podršku učenicima u procesu učenja, odnosima sa vršnjacima, razvijanju samopouzdanja, organizaciji svog vremena i obaveza, komunikacijskih vještina te drugih izazova sa kojima se djeca i mladi susreću tokom odrastanja. Posebna pažnja posvećuje se prevenciji vršnjačkog nasilja, sigurnosti na internetu, jačanju međusobnog poštovanja, mentalnom zdravlju i razvijanju zdravih životnih navika kod učenika.





Saradnja s roditeljima i zajednicom

Pored rada s učenicima, stručne saradnice aktivno pružaju podršku razrednicima, nastavnicima i roditeljima, kroz zajedničko praćenje razvoja i napredovanja učenika te rješavanje poteškoća u učenju i ponašanju. Osim toga, roditelji se mogu obratiti pedagogu ili psihologu za savjet i podršku, kada primijete poteškoće kod djece ili žele pomoći svom djetetu da lakše savlada školske izazove. Kroz zajednički rad škole i porodice, učenicima se pruža sigurnije i kvalitetnije okruženje za razvoj.



Za dobrobit djece

Da bi saradnja bila uspješna od izuzetne važnosti je da se odlazak kod pedagoga i psihologa ne posmatra kao vid sankcije i kazne već isključivo kao podrška za dobrobit djeteta. Povjerljiv razgovor sa stručnim licem može pomoći djetetu (učniku) da shvati šta mu se dešava u određenom momentu te da nauči kako se nositi s tim.



Zahvaljujući radu pedagoško-psihološke službe, škola nije samo mjesto učenja nego i mjesto podrške, razumijevanja i razvoja svakog učenika. Njihov trud doprinosi stvaranju pozitivne atmosfere u kojoj se učenici osjećaju prihvaćeno, sigurno i motivisano za uspjeh.



Slušamo.



Razumijemo.



Podržavamo.



Učenica generacije

ŠKOLSKA 2025/2026. GODINA

Predanost, disciplina i uspjeh čine je uzorom svoje generacije. Svojim radom i sportskim uspjesima ponosno predstavlja našu školu.



ŠKOLSKI USPJEH

Odličan uspjeh tokom cijelog školovanja, uz konstantan napredak i posvećenost.



SPORTSKA POSTIGNUĆA

Višestruka prvakinja u atletici. Ponosna predstavница škole na sportskim takmičenjima. Najbolja sportistkinja Grada Mostara,



INSPIRACIJA

Svojim radom, skromnošću i vedrinom inspiriše i motiviše svoje vršnjake.

Trud danas, ”
uspjeh sutra,
ponos zauvijek.



Nejlja Ćerić

UČENICA GENERACIJE





1. Prije svega, čestitamo ti na zasluženju tituli Učenice generacije. Kako si se osjećala kada si saznala za ovu vijest?

Hvala vam na čestitkama. Kada sam saznala da sam izabrana za Učenicu generacije, osjetila sam veliku sreću, ponos i zahvalnost. To je za mene jedno od najljepših priznanja koje sam mogla dobiti tokom osnovnog školovanja. Bila sam sretna jer je moj trud prepoznat i nagrađen, a istovremeno sam osjećala zahvalnost prema svima koji su me podržavali na tom putu.

2. Koliko truda, rada i odricanja stoji iza ovog uspjeha?

Iza ovog uspjeha stoji mnogo rada, discipline i upornosti. Tokom svih godina školovanja trudila sam se da budem odgovorna prema svojim obavezama i da uvijek dajem svoj maksimum. Naravno, bilo je trenutaka kada sam morala žrtvovati dio slobodnog vremena kako bih završila školske zadatke, pripremila se za takmičenja ili sportske aktivnosti. Ipak, svaki uloženi trud se isplatio i danas sam ponosna na ono što sam postigla.

3. Pored odličnog uspjeha, ostvarila si i zapažene sportske rezultate. Kako uspijevaš uskladiti školu, sport i druge aktivnosti?

Smatram da je dobra organizacija vremena ključ uspjeha. Trudila sam se da unaprijed planiram svoje obaveze i da vrijeme koristim što kvalitetnije. Nekada nije bilo lako uskladiti treninge i školske obaveze, ali sam uz podršku porodice, nastavnika i prijatelja uspijevala pronaći balans. Sport me naučio disciplini, odgovornosti i upornosti, što mi je mnogo pomoglo i u školovanju.

4. Koji trenutak iz osnovne škole ćeš posebno pamtiti?

Iz osnovne škole nosim mnogo lijepih uspomena, ali posebno ću pamtiti druženja sa svojim razredom, školske izlete, takmičenja i sportske događaje. Ipak, najdraži trenutak bio je kada sam proglašena Učenicom generacije jer je to predstavljalo krunu mog višegodišnjeg rada, truda i zalaganja. Također, s velikim ponosom ću pamtiti i trenutak kada sam proglašena Najboljom sportistkinjom Grada Mostara, jer je to priznanje za moj trud i uspjehe koje sam ostvarila u sportu. Oba priznanja za mene imaju posebno značenje i predstavljaju uspomene koje ću nositi sa sobom kroz cijeli život.

5. Ko ti je tokom školovanja bio najveća podrška i motivacija?

Najveću podršku pružili su mi roditelji i porodica, koji su uvijek vjerovali u mene i bili uz mene u svakom trenutku. Veliku zahvalnost dugujem i svom klubu ŽF/NK Emina, najboljim saigračicama kao i trenerima. Oni su me podsticali da razvijam svoje sposobnosti i postižem što bolje rezultate. Naravno, podrška prijatelja i nastavnika također mi je mnogo značila, posebno u trenucima kada je bilo potrebno dodatno ohrabrenje.

6. Koji su tvoji planovi za dalje školovanje?

Planiram nastaviti svoje obrazovanje u Staroj gimnaziji Mostar, jer smatram da je to škola koja mi može pružiti kvalitetno znanje i dobre mogućnosti za daljnji razvoj. Nakon toga željela bih upisati United World College (UWC), gdje bih nastavila svoje školovanje u međunarodnom okruženju, upoznala vršnjake iz različitih zemalja i stekla nova iskustva. Vjerujem da će mi takvo obrazovanje pomoći da dodatno razvijem svoje sposobnosti, proširim vidike i priprelim se za buduće izazove.

7. Kako zamišljaš sebe za deset godina?

Za deset godina zamišljam sebe kao uspješnu fudbalerku koja je ostvarila svoje snove i postigla značajne rezultate u sportu. Fudbal je moja velika ljubav i željela bih da jednog dana to bude posao kojim ću se baviti. Voljela bih igrati na najvišem nivou, predstavljati svoj klub i svoju državu te raditi ono što zaista volim. Pored sportskih uspjeha, želim nastaviti svoje obrazovanje, upisati fakultet i završiti sve stepene obrazovanja. Smatram da su znanje i obrazovanje veoma važni bez obzira na profesionalni put kojim se osoba bavi. Također želim nastaviti učiti, usavršavati se i doprinostiti zajednici svojim znanjem, iskustvom i trudom.

8. Za kraj, koju bi poruku uputila mlađim učenicima naše škole?

Poručila bih im da vjeruju u sebe i svoje sposobnosti, da budu uporni i da nikada ne odustaju od svojih ciljeva, bez obzira na prepreke na koje naiđu. Važno je redovno raditi, biti odgovoran i imati jasan cilj kojem teže, jer upravo nas ciljevi motivišu da budemo bolji iz dana u dan. Uspjeh ne dolazi preko noći, on je rezultat truda, rada, discipline i strpljenja.

Također, savjetovala bih im da iskoriste svaku priliku za druženje i razvijanje svojih talenata, bilo kroz školu, sport ili druge aktivnosti. Neka uživaju u svojim osnovnoškolskim danima, jer su to godine pune lijepih uspomena, prijateljstava i iskustava koja će pamtiti cijeli život.



Šta maturanti kažu o sebi....



IXa

Džan: Na terenu Džan dribla k'o iz vica, dres mu je Veleža k'o druga strana lica!

Emir: Kad se Emir nasmije, i zgrada se trese,
taj osmijeh svaku peticu donese.

Mak: Mak kroz vodu piči k'o motor na vodi,
do pobjede on uvijek prvi brodi.

Jan: Za Jana je stolica sprava za mučenje,
radije bi u krug, nego na učenje.

Vanja: U klupi Vanja ne pravi buku,
on tiho uči i diže ruku.

Anej: Anej kartu svijeta u malom prstu drži,
od Googla je u geografiji brži.

Edi: Uz Edija je svaki dan k'o proslava neka,
on je jaran kakvog svako od nas čeka.

Sani: U klupi Sani nove stvari uči,
svaki zadatak s lakoćom dokuči.

Daris: Daris je visok, to mu je dika,
iznad njega je samo od plafona slika.

Ema: Tiha je Ema i mirna k'o sjena,
od školskih briga ona je rasterećena.

Lejla: Plava joj kosa k'o iz reklame sja,
najljepši osmijeh u razredu ona ima.

Adna: Kad Adna prođe, svi se u red stave,
ona je mozak naše školske glave.

Hana: Hana je k'o struja, nikad nema mira,
energijom svojom cijeli razred dira.

Dalal: Samouvjereni Dalal k'o na pisti šeta,
nju ne može omesti ni cijela planeta.

Asja: Asja na sceni svaku ulogu "kida",
k'o da je s holivudskog stigla zida.

Defne: Defne i knjiga – nerazdvojni par,
za engleski jezik ima pravi dar!

Nejla (Ć): Na svakom terenu Nejla srce ostavlja,
kao prava sportašica pobjede proslavlja.

Nejla (V): Nježna je Nejla, razredna mezimica prava,
uz odlične ocjene u njoj mudra je glava.

Ejla: Kad kistom krene, Ejla čuda stvara,
predivnim slikama s nama razgovara.



Šta maturanti kažu o sebi....



IXb



Zara Ć sudžuk voli,
od njega Ninu glava boli.

Matti uvijek nešto pita,
on neće da skita.

Asya voli puno molit',
nastavnice možemo li se molim
Vas dogovorit'?

Sara se često češljat' stane,
bez tog ne može da opstane.

Dinana cijela škola voli,
kad ga nema srce nas boli.

Nađa advokat je razreda našeg,
argument joj je jak, da nema jačeg.

Puno se šali **Sandi**,
s njim nikad ne dosadi.

Dejo i Anis su uvijek skupa,
zna se ko je zadnja klupa.

Preljepo crta **Helena**,
ona je uvijek zaposlena.

Ela voli da svira violinu,
ima dobru disciplinu.

Lejla dobro uči,
test je nikad ne muči.

Nadia gitaru svira,
s njom nemaš mira.

Selma voli da pleše,
njoj se ljudi uvijek nasmiješe.

Nejla se šminkat' voli,
tome ne može da odoli.

Zara J. je na svakoj priredbi,
vidimo je u svakoj izvedbi.

Dino nikad nije tu,
uvijek je na putu.

Omaru ne treba dug stih,
uvijek je miran i tih.

Svaki sat **Isar** ide na aparat.

Prijateljstvo iskreno i osmijeh blag,
Zaid je našem razredu posebno
drag.



ŠKOLSKE AKTIVNOSTI

Školski život ne čine samo učionice i časovi, nego i brojni trenuci druženja, učenja, kreativnosti i zajedničkih uspjeha. Kroz različite aktivnosti, radionice, posjete i projekte naši učenici svakodnevno razvijaju znanje, prijateljstva i najljepše školske uspomene.

Prijem prvačića



Međunarodni dan pismenosti

Povodom Međunarodnog dana pismenosti (8. septembar), učenici su pod mentorstvom nastavnica Mirhunise Idrizović i Selme Mujan održali radionice na časovima Bosanskog jezika i književnosti. Kroz zanimljive aktivnosti, učenici su istraživali razvoj pisama u svijetu i Bosni i Hercegovini, izrađivali kartu najpoznatijih svjetskih pisama te provodili istraživanja o uticaju savremenih tehnologija na pismenost.

Radionica je završena inspirativnom porukom:

„Sve što mi treba je list papira i nešto za pisanje, a onda mogu svijet okrenuti naglavačke!“



PUT OKO SVIJETA ZA 80 MINUTA



Učenci naše škole, u pratnji nastavnice Alise Trbonja-Kahriman, posjetili su tradicionalni događaj „Put oko svijeta za 80 minuta“, koji je održan na Španskom trgu povodom Dana UWC-a Mostar. Tokom ovog šarenog događaja učenci su uživali u mirisima, okusima i zvucima različitih kultura svijeta, otkrivajući ljepotu raznolikosti i zajedništva.

EVROPSKI DAN JEZIKA



Učenci petog razreda naše škole imali su priliku da kroz radionicu „Mini Erasmus u učionici“ otputuju u četiri evropske zemlje – Njemačku, Italiju, Tursku i Španiju. Na zabavan i interaktivan način upoznali su se sa zanimljivostima, znamenitostima i prepoznatljivim simbolima ovih zemalja, te naučili osnovne brojeve na njihovim jezicima.

Radionicu su s puno truda i kreativnosti pripremili i vodili učenci VIIIa razreda Nedim, Sara, Farah i Merjem, koji su svojim mlađim drugarima približili duh evropske raznolikosti i važnost međukulturnog učenja.





Međunarodni dan srca

U Mostaru je povodom Međunarodnog dana srca održano predavanje o zdravoj ishrani i očuvanju srca, u saradnji sa Sportskim savezom i Agencijom za sigurnost hrane BiH.

Školu je predstavljala učiteljica Minela Gološ - Šuta.

Dan mentalnog zdravlja

Povodom Dana mentalnog zdravlja, Vijeće učenika organizovalo je radionice posvećene emocijama, stresu i međusobnoj podršci.

Aktivnosti su protekle u ugodnoj atmosferi, potičući empatiju i razumijevanje među učenicima.



Posjeta Institutu Yunus Emre Mostar
3. oktobra, učenici 4. i 5. razreda naše škole posjetili su Institut Yunus Emre Mostar povodom Dana otvorenih vrata.

Tokom posjete, učenici su imali priliku da se upoznaju sa turskim jezikom, kulturom i tradicijom.



Muzejsko-obrazovna aktivnost

Učenici naše škole, u pratnji nastavnica Dženite Pejak i Maide Grebović, učestvovali su u aktivnosti povodom izložbe "Šezdeset godina Partizanskog spomen-groblja u Mostaru" u Centru za kulturu.

Pod vodstvom muzejskog pedagoga Aide Šarac - Berbić, učenici su sa interesovanjem učili o značaju očuvanja kulturno-historijskog naslijeđa i pokazali veliku kreativnost.



Promocija knjige "Ljepotica Breza"

U okviru programa "Oktobar u Narodnoj biblioteci Mostar", održana je promocija knjige "Ljepotica Breza" autorice Vide Srete Žuljević – Bake pričalice, bivše učenice naše škole.

Na promociji su učestvovali učenici naše škole, koji su pod mentorstvom nastavnice Selme Mujan interpretirali tekstove iz knjige.



OKTOBAR-MJESEC KNJIGE



Susret s književnicom Vidom Sretom Žuljević
Povodom Mjeseca knjige, učenici literarne sekcije razgovarali su s mostarskom književnicom Vidom Sretom Žuljević o njoj knjizi „Ljepotica breza“. Nakon analize djela, učenici su pisali poeziju i predstavili svoje radove, razgovarajući o značaju knjige i književnosti u razvoju mladih.



Literarna sekcija organizovala je aktivnosti s ciljem poticanja čitanja i ljubavi prema knjizi. Učenici su preporučivali omiljene naslove i kroz likovne radove obogatili školski pano. Također, članice sekcije održale su edukativni čas u drugom razredu, povezujući učenike razredne i predmetne nastave.



Kada ti oktobar pokuca, kada na vrata stigne, sjeti se – MJESEC JE KNJIGE!



Članovi dramske i medijske sekcije pripremili su poučan video posvećen ljubavi prema knjizi, pod mentorstvom nastavnice Mirhunise Idrizović.



Učenici II i III razreda posjetili su Narodnu biblioteku Mostar i Biblioteku Kulturnog centra Kralj Fahd, gdje su kroz bajke i priče uživali u svijetu knjiga i mašte.



U oktobru smo obilježili Mjesec knjige kroz aktivnosti učenika IV i V razreda, koji su čitanjem i razmjenom omiljenih naslova promovisali ljubav prema knjizi i razvijanje čitalačkih navika.



Naši najmlađi – učenici prvog razreda – danas su napravili svoje prve korake u čarobni svijet knjiga. Posjetili smo školsku biblioteku, razgovarali o tome šta je knjiga i šta se u njoj krije, te zajedno izabrali slikovnice i dječije priče koje ćemo s radošću listati.



**Svaka knjiga – poseban doživljaj.
Svaki učenik – jedinstvena priča.
Svaka fotografija – trenutak mašte i kreativnosti.
Sekcija Školski medij donosi čitalačku čaroliju kroz objektiv učenika. ✨**

Edda Buljević VIIb



KNJIGA I JA



U okviru foto-izazova „Knjiga i ja“, povodom obilježavanja Mjeseca knjige, Edda Buljević osvojila je priznanje za najkreativniju fotografiju, istaknuvši se originalnošću i ljubavlju prema knjizi.

Povodom Međunarodnog dana štednje, učenici odjeljenja IIIb posjetili su Centralnu banku Bosne i Hercegovine – filijala Mostar, gdje su kroz edukativnu radionicu upoznali značaj štednje i rad banke.



Financijska edukacija za mlade

U saradnji s UniCredit Bank d.d. Mostar, u našoj školi je održana edukacija o finansijskoj pismenosti za učenike VIII i IX razreda.

Zahvaljujemo se direktorici Tei Buljević i timu UniCredit banke na saradnji, korisnim savjetima i ugodnom druženju!



Dan maternjeg jezika

Manifestacija „Bosanski jezik – moj svijet i moja svijest“

U organizaciji Pedagoškog zavoda Mostar, 20.2.2026. godine, u prostorijama Narodne biblioteke Mostar, održan je Poetski recital povodom Međunarodnog dana maternjeg jezika.

Naša učenica Asya Džanković (IXb) dostojanstveno i sa puno emocije predstavila je našu školu, pokazujući koliko jezik može biti i svijet i svijest – i korijen i krilo.

Za svoj nadahnuti nastup nagrađena je prigodnom zahvalnicom i zbirkom poezije.

Iskrene čestitke našoj Asyi, ali i njenoj nastavnici Mirhunisi Idrizović, koja predanim radom i ljubavlju prema jeziku, odgaja generacije koje znaju čuvati ono najvrijednije – riječ.



Bosanski jezik od smaragda

Pitaš me: „Čiji je ovo šapat što kroz noć plovi?
Čijim to pismom pišem svoje najluđe snove?“
To je onaj stari glas što se u meni ponovo rodi,
dok me modra Neretva ka izvoru svome vodi.

Nije on zapisan samo u knjigama što prašina krije,
već u svakom damaru što u grudima bije.
On je klesan u stancu kamenu, na pragu stare kuće,
on je naše jučer, naše danas i naše sutrašnje svanuće.

To je jezik koji ne poznaje zidove ni međe,
što se k'o bistra voda kroz vijekove cijedi.
U njemu je tuga sevdaha i radost dječijeg smijeha,
on je utočište duši, bez mrlje i bez grijeha.

Kad izgovorim „majka“, cijeli svijet u tu riječ stane.
Kad kažem „dom“, zacijele sve stare rane,
jer bosanski jezik nije samo govor, to je način kako se
voli,
snaga koja prkosi svakoj nepravdi i boli.

Čuvam ga pod jezikom k'o najdražu tajnu,
da mu ne ugase vatru, tu iskru beskrajnu,
jer dok on živi u meni, i ja ću uspravan biti,
iz te smaragdne rijeke vječno ću snagu piti.

Asya Džanković IXb

Dan maternjeg jezika

Povodom obilježavanja Međunarodnog dana maternjeg jezika i Dana nezavisnosti Bosne i Hercegovine u našoj školi je održana radionica pod nazivom „Gdje se bosanski jezik čita i piše, Bosna će da diše“ Kroz poeziju, prezentacije, igrokaz „Govor Mostara“, jezičke igre i kviz znanja, učenici su pokazali koliko razumiju i vole bosanski jezik i historiju domovine. Posebno nam je zadovoljstvo bilo ugostiti učenike Srednje medicinske škole Mostar, pod mentorstvom profesora Jasmina Macića, kao i naše bivše učenike koji su danas dio te škole.

U kvizu znanja takmičile su se ekipe Bijeli, Žuti i Plavi. Pobjedu je odnijela ekipa Plavi: Anej Branković, Nejla Ćerić i Defne Filibeli.

Čestitamo svim učesnicima na trudu, znanju i ljubavi prema jeziku i domovini. Dok god negujemo riječ – negujemo i Bosnu.



Povodom Dana maternjeg jezika, učenici razredne nastave od 2. do 5. razreda obilježili su ovaj važan datum kroz literarni konkurs.

Cilj aktivnosti bio je razvijanje ljubavi prema pisanju i njegovanje izražavanja na maternjem jeziku. Učenike koji su se posebno istakli u svom literarnom stvaralaštvu nagradili smo simboličnim poklonima i diplomama, kao znakom priznanja za njihov trud i kreativnost.

Na ovaj način željeli smo potaknuti sve učenike da s ponosom čuvaju i njeguju svoj jezik, jer je on važan dio našeg identiteta i kulturne baštine.



„Tamo gdje se teško živi- lijepo se govori“

Ć. Sijarić



MOJ JEZIK

Ja volim jezik svoj
jer pomoću njega svi razumiju
govor moj.

Moj jezik je moja riječ.
njime mogu svašta reći!

Njime pjevam, njime brojim,
i na bosanskom riječi krojim.

Njime kažem mama, tata,
otvara mi sva vrata.

U školi ga učim, čitam i pišem
pa mi nije žao se mučit'.

Volim bosanski jezik srcem svim
jer mogu pričati s bilo kim.
Ila Milavić III a

Jezik kojim me zove mama

Postoji jedan jezik koji ne učimo samo u školi. To je jezik kojim me mama zove imenom, kojim me tješi kada padnem i kojim mi kaže da je ponosna na mene. Na tom jeziku sam prvi put rekla: „Mama“ i „Volim te“. Njime su mi pričane uspavanke i bajke pred spavanje. U njegovim riječima čujem smijeh svoje porodice, šapat tate i savjete mame.

Moj maternji jezik nije samo skup riječi. On je moj dom. U njemu su naše pjesme, običaji i priče o prošlosti. Kada govorim svojim jezikom, osjećam da pripadam svojoj porodici, svom narodu i svojoj zemlji.

Ako zaboravimo svoj jezik, zaboravićemo dio sebe. Zato ga trebamo čuvati, voljeti i prenositi dalje, kao najljepši poklon budućim generacijama. Jer dok god govorimo svojim maternjim jezikom – živjeće i naše uspomene.

Belma Džubur IIIa

Dan maternjeg jezika

Dan maternjeg jezika obilježava se 21. februara. To je jezik koji učimo od svoje majke, porodice i u školi. Na tom jeziku pričamo, pišemo, pjevamo i učimo.

Maternji jezik je dio našeg identiteta.

On čuva našu tradiciju, običaj i kulturu.

Svoj maternji jezik trebamo voljeti, pravilno ga govoriti i pisati.

Tako pokazujemo poštovanje prema svojoj kulturi i narodu.

Moj maternji jezik - moje blago!

Elif Osmanović III a



Moj maternji jezik

Moj maternji jezik je bosanski. To je jezik kojim sam izgovorila prve riječi. Većina beba uglavnom izgovori mama, babo ili tata. Ja sam eto prvo rekla neću.

Bosanski jezik je bogat i lijep. On je most koji nas spaja. Povezuje me s porodicom i ljudima koji me okružuju.

Zahvaljujući bosanskom jeziku ja mogu napisati sastav u školi, naučiti mnogo toga. Mogu izraziti svoja osjećanja, misli i potrebe.

Na bosanskom jeziku napisane su mnoge priče, pjesme i bajke koje rado čitam.

Moja učiteljica je osmislila da u školi svaki dan čitamo po neku novu priču, pored osnovnog gradiva koje svaki dan obrađujemo. Zahvaljujući tome još više i bolje upoznajemo svoj jezik. Učimo nove riječi i svoj rječnik činimo još bogatijim.

Bosanski jezik nas uči ko smo i odakle dolazimo. Zato ga trebamo čuvati i voljeti.

Ja sam ponosna na svoju domovinu Bosnu i Hercegovinu i svoj maternji jezik bosanski.

Nejra Salčin III a

Moj maternji jezik

Postoje riječi koje ne učimo iz knjiga, nego ih pronademo u zagrljaju zavičaja. One su tihe, jedinstvene i tople, ali u njima stane jedan čitan svijet.

Prve riječi su me pratile i prije nego što sam ih potpuno razumio. Nisu to bile velike, važne riječi, nego male riječi koje mirišu na zavičaj. U njima je bio smijeh moje porodice i tišina večeri kada se svjetla gase.

Kasnije sam upoznao mnogo drugih jezika, ali nijedan nije vodio tako ravno do srca kao moj maternji jezik. U njemu ne tražim riječi – one pronađu mene.

U tim riječima čuva se uspomena, koraci djetinjstva i glasovi onih koje volim. One me podsjećaju odakle sam krenuo i gdje pripadam, čak i kad sam daleko.

Zato maternji jezik nije samo govor, nego svjetlo koje nosim sa sobom. Dok god govorim njime, znam ko sam.

Mak Ivetić, Va

Jezik moj

Bogata je zemlja moja
Ljudima s tri nacije i tri vjere
I sa isto toliko različitih,
A opet istih jezika svi vele.

Nijanse su male,
A sinonima veliki je broj.
Rekao on na bosanskom, hrvatskom ili srpskom,
Razumijem prijatelja svog.

Je li mi nena dala hljeba,
Ili baka kruha
Sa hurdom ili urdom,
Jednako sladak zalogaj je to.

I voz i vlak
Na istu destinaciju me vode
Da stvaram uspomene nove.

Kada historiju, istoriju ili povijest učim
Istu muku mučim.

Popnem li se do osmog sprata ili kata
Tegoba jednako je jaka.

I tako unedogled mogu nabrajati sad
Da bogatstvo jezika svoga predstavim ja.

Damir Katica III a 

Predavanje o prevenciji vršnjačkog nasilja povodom Dana ružičastih majica. Pripadnici MUP-a HNK, Ivan Žilić i Asja Čolić, održali su u našoj školi interaktivno predavanje o vršnjačkom nasilju za četrdeset učenika od V do VIII razreda. Tokom predavanja, učenici su se informisali o oblicima nasilja, posljedicama i ulozi policije u njegovom suzbijanju. Zahvaljujemo se predstavnicima MUP-a na doprinosu preventivnom radu i saradnji u izgradnji sigurnijeg školskog okruženja.



Dana 25. februara u našoj školi obilježen je Dan ružičastih majica – Pink Shirt Day. U organizaciji Vijeća učenika održana je učenička konferencija na kojoj su učenici od VI do IX razreda otvoreno govorili o prevenciji nasilja, toleranciji i međusobnom poštovanju. Jasno su poručili da nasilju nema mjesta u našoj školi. Ponosni smo na zrelost, hrabrost i odgovornost koju su pokazali. Kada učenici preuzmu inicijativu, znamo da škola ide u dobrom pravcu.



Učenci razredne nastave obilježili su Dan ružičastih majica gledanjem animiranog filma Glavonja, koji na dirljiv i zanimljiv način govori o prijateljstvu, prihvatanju različitosti i važnosti međusobnog poštovanja. Kroz priču filma učenici su razgovarali o vršnjačkom nasilju, empatiji i pružanju podrške drugima, te još jednom podsjetili koliko su tolerancija, ljubaznost i razumijevanje važni u svakodnevnom životu. Obilježavanje ovog dana bilo je lijepo i poučno iskustvo za sve učenike.



Učenici osmog i devetog razreda naše škole posjetili su Dan nauke na Agromediteranskom fakultetu Univerziteta Džemal Bijedić u pratnji psihologa Saudine Udovičić i nastavnice Alme Salčin. Kroz zanimljive eksperimente, radionice i razgovore sa studentima upoznali su praktičnu primjenu ekologije, biologije i biotehnologije. Posebno su ih oduševile demonstracije nenjutnovske tekućine, senzorne analize soka i izrade sjemenih bombi za zaštitu okoliša.





Dan engleskog jezika

U našoj školi je na kreativan i edukativan način obilježen Dan engleskog jezika. Kroz prezentacije i Kahoot kvizove, učenici su istraživali značaj engleskog jezika, kulturu engleskog govornog područja te djela Williama Shakespearea.

Posebno uzbuđenje donijelo je Spelling Bee takmičenje u petom razredu. U takmičenju je korištena i inovativna "Shuffle" metoda za izbor riječi, koju je osmislio i dizajnirao učenik Nedim Agić, što je cijelom događaju dalo dodatnu digitalnu dimenziju.

Takmičenje su s puno posvećenosti vodili učenici VIIIa razreda: Farah Mahić, Sara Macić i Nedim Agić.

Ponosni smo na sve naše učenike koji kroz razvijanje jezičkih vještina otvaraju vrata znanju i svijetu.

Čestitamo svim učesnicima na trudu i zavidnom znanju!

Dan poezije

Učenici osmog razreda obilježili su Svjetski dan poezije, kroz zanimljive i kreativne aktivnosti posvećene poznatim svjetskim i domaćim pjesnicima. Tokom obilježavanja učenici su istraživali život i djela Williama Shakespeare-a, Williama Wordswortha, Rudyarda Kiplinga i Alekse Šantića. Kroz zajednički rad učenici su izrađivali panoe sa citatima, ilustracijama i najpoznatijim stihovima ovih književnika. Učionica je bila ispunjena kreativnošću, bojama i stihovima koji su pokazali koliko poezija može biti inspirativna i danas. Učenici su na zanimljiv način povezali književnost, umjetnost i timski rad, te još jednom dokazali da poezija živi kroz mlade generacije.



Centralna svečanost povodom Dana nezavisnosti Bosne i Hercegovine



Dana 27. 2. 2026. godine, učenici šestog razreda, u pratnji nastavnika, prisustvovali su centralnoj svečanosti u Jablanici povodom Dana nezavisnosti Bosne i Hercegovine. Tokom programa, učenici su dostojanstveno odali počast domovini, pokazujući ljubav, poštovanje i osjećaj pripadnosti svojoj zemlji.

Posebno smo ponosni na njihovo aktivno učešće u scensko-muzičkoj izvedbi uz pjesmu „Studen voda“, u izvođenju Armina Muzaferije i Sarajevske filharmonije. Učenici VIa razreda, predvođeni nastavnicom Jasminom Rebac, kroz plesni performans prenijeli su snažnu poruku jedinstva, snage i ljubavi prema domovini.

Njihov nastup bio je izraz ponosa, hrabrosti i nade u budućnost Bosne i Hercegovine.



Posjeta vrtiću Planet Montessori

Zajedno sa nastavnicom Bosanskog jezika i književnosti, Selmom Mujan, učenici naše škole Nedim, Farah i Enida govorili su o tradiciji i bajramskim običajima u Bosni i Hercegovini. Mališani su s pažnjom slušali i aktivno učestvovali u razgovoru.

Radionica je završena izradom koverti za čuvenu „bajram banku“, kojoj su se svi posebno obradovali. Naši učenici pokazali su mnogo strpljenja, kreativnosti i topline u radu s najmlađima.

Ovakve radionice podsjećaju nas koliko su zajedništvo, razumijevanje i međusobno poštovanje važni u odrastanju i učenju.



U susret Ramazanu

U Narodnom pozorištu Mostar održan je program povodom dočeka mjeseca Ramazana u organizaciji Medžlisa Islamske zajednice Mostar. U programu su učestvovali i učenici naše škole – hor je izveo ilahiju „I nebo i zvijezde“, dok su program moderirale učenice Farah Mahić i Nea Ćurić. Ponosni smo na naše učenike koji su dostojno predstavili školu. Ramazan šerif mubarek olsun.



Zajednički iftar

Učenici petog razreda zajedno su učestvovali u organizaciji iftara i zajedničke večere, njegujući vrijednosti poštovanja, prijateljstva i međusobnog uvažavanja. U aktivnosti su učestvovali učenici koji pohađaju Islamsku i Pravoslavnu vjeronauku, kao i učenici koji ne pohađaju vjeronauku, s ciljem jačanja zajedništva i razumijevanja različitosti.

Posebna pažnja posvećena je pripremi jelovnika kako bi svaki učenik imao obrok prilagođen svojim potrebama i tradiciji. Zahvaljujemo se Aščinici Saray na saradnji, razumijevanju i doprinosu da ova večer protekne u lijepoj i ugodnoj atmosferi.





Svjetski dan svjesnosti o autizmu

Povodom Svjetskog dana autizma, 2.4.2026. godine, u našoj školi održana je edukacija i radionica „Most razumijevanja“. Učenici, roditelji i nastavnici zajedno su gradili simbolični most od kamenčića s porukama podrške, ljubavi i zajedništva, šaljući snažnu poruku o važnosti empatije, prihvatanja i razumijevanja različitosti.

Radionicu su pripremile učiteljica Almedina Bašić i asistent u nastavi Amila Ždralović.



Učenici sedmog razreda obilježili su Svjetski dan svjesnosti o autizmu kroz gledanje animiranog filma, razgovor i grupni rad na temu prihvatanja i razumijevanja različitosti.

Kroz aktivnosti učenici su pokazali empatiju, zrelost i otvorenost, još jednom potvrđujući koliko su podrška, razumijevanje i međusobno poštovanje važni za stvaranje sigurnog okruženja za sve.



Pozorište lutaka Mostar

Učenci razredne nastave su posjetili Pozorište lutaka Mostar i uživali u predstavi „Baštovani mašte“.

Kroz spoj poezije, sjećanja i glume, predstava je oživjela likove iz prošlosti i pokazala koliko je mašta važna za svako dijete. Naši učenici su s velikim interesovanjem pratili svaki trenutak i iz pozorišta izašli puni lijepih utisaka i osmijeha.

Jer mašta je vrt koji treba njegovati – svaki dan.



Svjetski dan zdravlja

Učenci trećeg razreda obilježili su Svjetski dan zdravlja kroz kreativne i edukativne aktivnosti.

Pogledali su prezentaciju na temu zdrave ishrane, a zatim crtali piramidu zdrave ishrane, učeći o važnosti pravilnog izbora namirnica.

Tokom odmora uživali su u ukusnom voću i svježem zraku, podsjećajući se koliko su male zdrave navike važne za naše tijelo i duh.

Zajedno učimo da zdravlje počinje od nas samih – kroz znanje, igru i dobre navike!



Tanjir zdravlja

Učenci drugog razreda su kroz radionicu „Tanjir zdravlja“ učili o važnosti pravilne ishrane i zdravih navika. Nakon toga, učenici su kroz igru i istraživanje u parku otkrivali svijet biljaka i insekata, povezujući zdravlje sa prirodom koja nas okružuje.





Dan Armije RBiH

Povodom Dana Armije Republike Bosne i Hercegovine učenici naše škole posjetili su „Memorijalni centar 92–95“, gdje su odali počast borcima Armije RBiH i upoznali se sa događajima iz perioda odbrane Mostara. Kroz razgovor o slobodi, miru i značaju očuvanja historijske istine, učenici su razvijali svijest o poštovanju prema onima koji su dali doprinos odbrani našeg grada. U pratnji učenika bile su nastavnice Maida Grebović i Mirhunisa Idrizović.



Mostar ponovo čita

U okviru manifestacije „Mostar ponovo čita“, u organizaciji Narodne biblioteke Mostar, učenici naše škole učestvovali su u aktivnostima Sajma knjige na otvorenom. Učenici VII i VIII razreda prisustvovali su svečanom otvaranju sajma, dok su učenici drugog razreda uživali u radionici kreativnog čitanja sa Čikopiscem Elvirom Halilovićem i pričom „Bilježnica gospodina Kaktusa“. Kroz druženje i kreativne aktivnosti učenici su pokazali veliko interesovanje za knjigu i čitanje.



Recikliraj u školi

Na Agromediteranskom i prehrambeno-tehnološkom fakultetu Mostar održana je edukativna radionica u okviru pilot-projekta „Mostar voli – recikliraj u školi“. Učenici naše škole, od šestog do devetog razreda, u pratnji koordinatorice Alme Salčin, prisustvovali su radionici te na zanimljiv i pristupačan način stekli nova saznanja o jednom od najvećih izazova današnjice – odlaganju otpada.

Prema procjenama, više od 60% otpada može se reciklirati, što jasno pokazuje koliko svaki pojedinac može doprinijeti očuvanju okoliša.

Najvažnija poruka današnje edukacije je jednostavna, ali snažna: „Male promjene u svakodnevnim navikama vode ka velikim promjenama.“

Sakupljajmo, razdvajajmo i reciklirajmo – zajedno 32
čuvajmo naš okoliš!



Kamišibaj festival - Tuzla

Naše učenice oživjele bezvremensku priču i oduševile publiku!

Sa ponosom dijelimo da su učenice Dramske sekcije naše škole, zajedno sa učiteljicom Minelom Gološ - Šuta, učestvovala na 2. Kamišibaj festivalu u Bosni i Hercegovini, održanom u Tuzli 21. 4. 2026. godine. Kroz ovu posebnu umjetnost pripovijedanja predstavile su priču o Aleksi i njegovoj Emimi, donoseći emociju, kreativnost i ljubav prema književnosti na scenu i pravo u srca publike.

Čestitamo našim učenicama – Adini Žarkušić, Azri Čaušević i Ayse Filibeli na sjajnom predstavljanju škole!



UEFA Playmakers

Učenice trećeg razreda učestvuju u UEFA Playmakers programu kroz koji na zabavan i kreativan način upoznaju svijet nogometa. Kroz igru, druženje i timski rad razvijaju samopouzdanje, motoričke sposobnosti i osnovne fudbalske vještine, stvarajući lijepe uspomene i sportski duh.



Dan planete Zemlje

Povodom Dana planete Zemlje, učenici naše škole učestvovali su u edukativnim i kreativnim aktivnostima koje je organizovala Osnovna škola Gnojnice. U pratnji nastavnice Jasmine Rebac, učenici su pokazali znanje i kreativnost kroz eko-kviz i likovnu koloniju. Poseban uspjeh ostvarila je učenica Asija Fazlić osvojivši 4. mjesto na eko-kvizu, dok su u likovnom dijelu programa učestvovala Merjem Kazić, Merjem Husković i Asija Fazlić.



Edukacija "Boranka"

U okviru kampanje „Boranka u BiH”, učenici četvrtog i petog razreda naše škole učili su o važnosti šuma i pošumljavanja. Kroz interaktivne aktivnosti pokazali su veliku zainteresovanost za zaštitu okoliša, podsjećajući nas na važnost ekološkog odgoja od najranije dobi.

Djeca koja nauče voljeti prirodu, čuvat će je cijeli život.



Dan ispunjen osmijesima i druženjem

Učenici petog razreda naše škole učestvovali su na manifestaciji „Future-A Festival za djecu 2026“ održanoj u Potocima. Kroz igru, druženje i brojne zabavne aktivnosti proveli su dan ispunjen osmijesima, radošću i lijepim uspomjenama.

Festival je bio prilika za druženje, razvijanje zajedništva i uživanje u sadržajima prilagođenim djeci, a posebno zadovoljstvo bilo je vidjeti vedro raspoloženje i sreću naših učenika tokom cijelog događaja. Zahvaljujemo organizatorima na lijepo organizovanoj manifestaciji i ugodnoj atmosferi.



Četvrti Zeleni dan

Članovi Ekološke sekcije naše škole, u pratnji nastavnice Alise Trbonja-Kahriman, posjetili su Agromediteranski fakultet Univerziteta „Džemal Bijedić“ u Mostaru povodom manifestacije „Četvrti Zeleni dan“.

Učenici su imali priliku upoznati se sa značajem zaštite okoliša, uređenjem zelenih površina i različitim vrstama ukrasnog, ljekovitog i začinskog bilja. Posebno zanimljiv bio je nutricionistički kutak sa degustacijom zdravih proizvoda pripremljenih kroz praktičan rad studenata.

Na poklon su dobili sadnice za školsko dvorište, uz korisne savjete za njihovo održavanje.





SELEKTOR BARBAREZ



U NAŠOJ ŠKOLI!



Posjeta selektora fudbalske reprezentacije Bosne i Hercegovine, Sergeja Barbareza, našoj školi pretvorila je običan školski dan u poseban događaj ispunjen emocijama, osmijesima i ponosom. Učenici su sa velikim uzbuđenjem dočekali čovjeka koji inspiriše mnoge generacije mladih sportista i navijača širom Bosne i Hercegovine.



BIO JE OVO POSEBAN DAN

Dolazak selektora Barbareza u našu školu bio je za sve nas poseban i nezaboravan.



ZAJEDNO SMO JAČI

Selektor je s nama razgovarao o fudbalu, školi, životu i vrijednostima koje su važne za uspjeh.




SNOVI POSTAJU CILJEVI

Ovaj susret bio je snažna motivacija svim učenicima da vjeruju u sebe i svoje mogućnosti.

PORUKA KOJA OSTAJE

„Najvažnije je biti dobar čovjek, vrijedno raditi i nikada ne prestati sanjati. Budite ponosni na sebe, svoju školu i svoju domovinu!“





Svjetsko prvenstvo

**Od Une pa do Drine,
čuje se pjesma domovine.
Svako srce isto diše,
kad se ime Bosne piše.**

**Kad na teren naši stanu,
ponos se vidi u svakom stavu,
a u očima nada sja,
jer Bosna je domovina svima.**

**Zastava se nebom vije,
ponos naš svakim trenom grije.
Dok igrači hrabro stoje,
brane boje zemlje moje.**

**Svaki gol k'o sunce grane, briše
tugu i teške dane, a s tribina glás
se ori: „Bosno moja ti se bori”.**

Azra Kevelj VI b



HVALA NA POSJETI!

**Zahvaljujemo našem
selektoru na dolasku,
podršci i inspirativnim
riječima. Vrata naše škole
su uvijek otvorena!**



Iz školske klupe u Zbornik sevdalinki

Sa radošću dijelimo vijest da su pjesme naših učenica **objavljene** u Zborniku najboljih sevdalinki i pjesama koje podsjećaju na sevdalinku za 2025. godinu, u okviru prestižnog konkursa „Vuka Šeherović“, na koji je pristiglo 208 pjesama iz cijele Bosne i Hercegovine i regiona.

Posebno čestitamo našim učenicama: 



Farah Mahić
„U tišini“




Merima Kazazić
„Čežnja za zumbulom“

Njihove pjesme prepoznate su od strane stručnog žirija i uvrštene među najbolje, čime su pokazale da se sevdah ne uči samo iz knjiga – on se nosi u srcu.

Bravo za naše Farah i Merimu! 

Čuvate ono što su generacije prije nas stvarale i ostavile u amanet.

Škola je ponosna, a tradicija živa
dok ima mladih koji je pišu –
stih po stih. 



Čežnja za zumbulom

Merima Kazazić, Villa

Čim se u sabah probudim uz ezan
siđem sa čardaka, izađem u bašču,
pa pogledam ovaj tihi dunjaluk,
a duša mi opet odluta u maštu.

Aferim sebi šapnem tiho,
kad zumbule vidim niz bašču,
k'o da mi tajna srca progovara,
a ne smijem im ni prič', nit ih dozvat'.

Bujrum šumi vjetar kroz listove,
al' nafaka nije da se cvijet takne,
svaki je pogled sevap za dušu,
al' korak bliže – zahmet da izmakne.

Rahatluk nose mirisom k'o šerbe,
u devru svome stoje k'o da sniju,
sabur mi treba da prođem kraj njih,
da tajnu srca u sebi skriju.

Zumbuli stoje – visoki, nijemi,
rahmetli sjaj im u zoru sija,
k'o da mi kažu: „Dunjaluk prolazi,
a što je srcu – samo srce zna.“







U tišini




U tišini sabaha ranog, kad se rosa s đula budi,
Zadrhti mi srce nježno, k'o behar pod lahkom studi,
Zovem tvoje ime tiho, k'o da strah me da te budim,
A vjetar ga nosi tebi, da ti vidiš da ga ljubim.




Kada zora svijetla, čedna, obasjava mahalu tvoju,
U grudima planu želja, da ja vidim ljubuu moju,
Tako hodim starim drumom, gdje smo skupa znali poč',
Srce ludo još se nada, da ćeš meni opet doć'.




Čekam tebe hanumo moja, k'o što vrelo čeka tok,
K'o đul bez sunca ja ti venem, čekam hoćeš meni doć,
A vrijeme hladno k'o mraz ljuti, tragove naših stopa briše,
Moje srce zalud čeka, a tebe kraj mene ljube nema više.




Kad noć nad kaldrmom padne, duša tvoje ime zbori,
Pa me budi mehak lahor, a tvoj glas kao da govori,
Ja još sanjam tvoje ruke, boje kao behar bijeli,
Nježne kao sabah zore, e njih ti ljube srce želi.



Đerdan tuge oko vrata mog, k'o okov težak visi,
Srce kao ptica bez gnijezda, treperi i pita se gdje si,
Nada moja ne nestade nikad, u srcu k'o cvijet se krije,
Čeka tebe niz basamke da sideš, jer bez tebe života mi nije.



Ako ikad sudbe bude, da se opet vratiš meni,
Svu ljepotu dunjaluka ovog, ja ću dati ljube tebi,
Jer bez tebe ostarit ću, međ' stijenama starog svijeta,
Da te čekam, da te sanjam, dok me zemlja sebi ne da.



A kad moja duša klone, k'o fenjer u kasnu noć,
Kad koraci moji teški, ne imahu snage više nikud poč',
Kad mermerni šadrvan ostane suh i zgasne svjetlo s pendžera tvog,
Ostat će stara mahala pusta, da čuva trag tužnog života mog.

Farah Mahić Villa



Stihovi KOJI OSVAJAJU

Na završnoj večeri 13. izdanja Šantićev festival djece pjesnika, održanoj u Narodnom pozorištu Mostar, našu školu predstavljala je Nadia Kurt, učenica VI razreda JU „VI osnovna škola“ Mostar, autorskom pjesmom „Jezera“.

Nadia je svojim stihovima pokazala kreativnost i ljubav prema pisanju, a za pjesmu „Jezera“ osvojila je diplomu za najbolju misaono-pejzažnu liriku.

Ponosni smo na uspjeh naše učenice i želimo joj još mnogo inspiracije i književnih priznanja u budućnosti!



Jezera

*Jezera plave boje
bistre duše
Svi ljudi oko njih
u ljepoti toj se guše.*


*Al' ljepota nije sve
Tajne tonu duboko ka dnu
čekajući da se razotkriju,
da opet zasjaji i žive,
da svijet više ne bude boje sive.*

*Dok se svijet mračni, jezera sjaje
Svijet tone u dubine, ne postaje jači
Ali on se ustaje u visine se vije –
da opet visoke oblake dodirne.*

*Svijet je bolji, ali ima još nešto,
On je ipak i dalje ono staro mračno mjesto.
Visine ipak nisu vječne.*

*Dubine čekaju i rijeke mliječne
Svijet se diže i pada dok opet ne stane
Ali se čeka taj dan
možda je čak i sutradan.*

Nadia Kurt VI a



“
Poezija je jezero u kojem
se ogledaju najdublje misli i snovi.
”


PONOSNI SMO NA NAŠU UČENICU NADIJU KURT!

Nadijina dva likovna rada izložena su u okviru manifestacije „Šantićeve večeri“, a za učešće na konkursu „Moj grad, sa Šantićem kroz Mostar“ nagrađena je diplomom za kreativnost i maštovitost.



ČESTITAMO NADIJI

i želimo joj još mnogo uspjeha, inspiracije i lijepih umjetničkih trenutaka!





Crveno srce Mostara

Naša učenica predstavila se autorskom pjesmom u okviru Šantićeve večeri poezije

PJESMA: CRVENO SRCE MOSTARA

*Velež, Velež volimo ga svi,
najjača ljubav tu živi.
Ljubav, slava i vječita nada
Našeg Mostara grada.*

*Crveno srce Mostara gori,
Velež se voli u svakoj zori.
Na tribini pjesma snažno se čuje,
Za Rodene život se daruje!*

*Malen jesam al' za ljubav znam,
crveno slovo napisati sam.
Učio me Stari što vječna je slava,
Rođeni to su kaže malena glava!*

Nadia Šišić, IIb



U prelijepom ambijentu bašte Spomen sobe Svetozara Ćorovića, **29.5. 2026.** godine, naša učenica IIb razreda, **Nadia Šišić**, predstavila se autorskom pjesmom „Crveno srce Mostara” u okviru manifestacije Šantićeve večeri poezije.



Nadia je kroz stihove na poseban način iskazala ljubav prema svom gradu i Rođenima, prenoseći emociju, ponos i mostarski duh publici koja je njen nastup nagradila velikim aplauzom.



Ponosni smo na našu učenicu koja svojim talentom, kreativnošću i ljubavlju prema pisanju dostojanstveno predstavlja školu.



Želimo joj još mnogo inspiracije i uspjeha na njenom poetskom putu.



“

“Poezija je most između srca i riječi.”


”



Azrin osmijeh



Naša učenica među nagrađenima na konkursu „Svijet bez granica“



Pjesma: *Azrin osmijeh*



Na sceni pleše, lahka kao san,
S njom je ljepši baš svaki dan.
U glumi vješta, likove stvara,
U srcu nosi hiljadu žara.



Iako mirna, kao tiha rijeka,
Vesela duša kod nje te čeka.
U dnevniku njenom petice stoje,
Najljepše niže uspjehe svoje.



Pametna, draga, u svemu sjajna,
Naša je Azra prava tajna,
Spojila znanje, talenat i rad,
Ona je ponos i našeg srca sklad.



Pjesmu napisala:

Adina Žarkušić.
IV b-razred



Učenica naše škole, **Azra Čaušević**, ostvarila izvanredan uspjeh na konkursu „Svijet bez granica: kako zamišljam pravedniji svijet za svu djecu“.



Na konkurs je pristiglo čak 128 radova iz cijele Bosne i Hercegovine, a dječiji radovi kroz priče, crteže i video sadržaje poslali su snažne poruke o dječijim pravima, jednakosti i pravednijem društvu za svu djecu.



U kategoriji učenika uzrasta od 7 do 10 godina među nagrađenim učesnicima našla se i naša **Azra Čaušević** iz Mostara, što predstavlja veliki uspjeh i ponos za našu školu.



Ovaj konkurs realizovan je u okviru projekta „Povezivanje tačaka 2 – Unapređenje učešća djece u donošenju odluka za poboljšana prava djeteta i demokratije u BiH“, koji implementiraju World Vision BH Fondacija i Udruženje „Naša djeca“ Sarajevo u partnerstvu sa Ministarstvom za ljudska prava i izbjeglice BiH, uz finansijsku podršku Evropske unije u Bosni i Hercegovini.



Čestitamo našoj Azri na ovom vrijednom priznanju i želimo joj još mnogo uspjeha, kreativnih ideja i lijepih trenutaka u budućem radu!



DOBRO NAM DOŠLI, PRVAČIĆI!

U našu školu uskoro stižu novi osmijesi, nova prijateljstva i prve školske uspomene. Sa radošću dočekujemo generaciju prvačića koja će svoje prve korake u svijetu znanja napraviti upravo u našoj školi.



„Svaki novi prvačić donosi novu radost u našu školu. Radujemo se zajedničkom učenju, druženju i stvaranju najljepših školskih uspomena.”

Posjeta javnim i vjerskim ustanovama

Učenci trećeg razreda imali su priliku obići nekoliko važnih ustanova u našem gradu: Hadži Balinu džamiju, pravoslavnu Sabornu crkvu Svete Trojice te JP BH Poštu Mostar. Tokom posjete učenci su:

- naučili da vjerske ustanove čuvaju tradiciju, vjeru i kulturu naroda,
- vidjeli kako džamija i crkva izgledaju iznutra i saznali više o njihovoj historiji,
- razgovarali o važnosti međusobnog poštovanja i uvažavanja različitosti,
- upoznali se sa radom pošte i saznali kako se šalju pisma i paketi te zašto je ova javna ustanova važna za svakodnevni život građana.

Učenci su sa velikim interesovanjem postavljali pitanja i pažljivo slušali, a ovakve posjete pomažu da bolje razumiju zajednicu u kojoj žive.

Cilj ovakvih aktivnosti je da učenci razvijaju znanje, toleranciju i osjećaj pripadnosti, jer javne i vjerske ustanove čine naš grad bogatijim i povezanim mjestom za život.



Mostar – grad koji spaja: Terenska nastava za učenike šestih razreda

Učenici šestog razreda učionicu su zamijenili ulicama Mostara, učeći o gradu kroz njegove ljude, historiju i simbole zajedništva.

Šetnja je započela u Šantićevoj ulici, nastavila se preko Bunura i Fejićeve, uz priče o Mostaru koji stoljećima povezuje različitosti. Prva stanica bila je Pravoslavna crkva Svete Trojice, gdje su učenici imali priliku osjetiti mir i upoznati dio bogate duhovne i kulturne baštine grada. Nakon toga obišli su Stari grad i stali na Stari most – simbol Mostara i jedan od najprepoznatljivijih spomenika zajedništva i povezivanja među ljudima.

Put ih je potom vodio do Hadži Memije Cernice džamije u Cernici, a zatim i do Franjevačke crkve Svetog Petra i Pavla, čime su učenici kroz neposredno iskustvo upoznali različite vjerske i kulturne tradicije koje stoljećima žive u Mostaru.

Ova terenska nastava nije bila samo obilazak znamenitosti, nego i važna životna lekcija o poštovanju različitosti, razumijevanju i međusobnom uvažavanju.

„Mostar nije samo grad – Mostar je lekcija“!

Dan proveden među mostarskim ulicama, mostovima, crkvama i džamijama ostavio je snažan utisak na učenike, ali i podsjetio da upravo ovakve aktivnosti grade duh zajedništva i tolerancije među mladima.



Sunce u našoj školi: Bili smo domaćini Udruženju „Sunce“!

Naši prvačići imali su priliku ugostiti drage prijatelje iz Udruženja za podršku osobama sa intelektualnim i kombinovanim teškoćama „Sunce“ Mostar.

Kroz zajedničku radionicu pod nazivom „Sunce“, naši najmlađi učenici su učili o važnosti prihvatanja, različitosti i iskrenog prijateljstva. Bilo je to predivno iskustvo ispunjeno kreativnošću, pjesmom i, što je najvažnije, međusobnom podrškom.

Ponosni smo na naše prvačiće koji su pokazali veliko srce i empatiju, te hvala Udruženju „Sunce“ što su svojim dolaskom obogatili naš školski dan i naučili nas važnim životnim lekcijama.

Kada se male ruke slože i različitosti spoje, nastaju najljepše priče!




DAN PORODICE NA BUNICI

Danas smo na izletištu Bunica obilježili tradicionalno Dan porodice u organizaciji JU „VI osnovna škola“ Mostar. Dan ispunjen osmijesima, druženjem, igrom i lijepom atmosferom još jednom je pokazao koliko su zajedništvo, prijateljstvo i porodične vrijednosti važan dio naše škole.

Učenici, roditelji, nastavnici i učitelji zajedno su uživali u zabavnim aktivnostima, razgovoru i trenucima koji ostaju u lijepom sjećanju.

Hvala svima koji su svojim prisustvom, dobrom energijom i osmijehom uljepšali ovaj dan i učinili ga posebnim. JU „VI osnovna škola“ Mostar – škola koja gradi znanje, prijateljstvo i zajedništvo.



Radionice engleskog jezika „Personal and Professional Growth of Youth in BiH”


U periodu od 21. do 23. aprila 2026. godine učenici naše škole učestvovali su na radionicama engleskog jezika u organizaciji Univerziteta „Džemal Bijedić” u Mostaru, Fakulteta humanističkih nauka – Odsjeka za engleski jezik i književnost.

Naši učenici imali su priliku učestvovati u zanimljivim i edukativnim radionicama na temu „Personal and Professional Growth of Youth in BiH”, kroz koje su razvijali komunikacijske vještine, kreativnost i timski rad.

Diplome za uspješno učešće dobili su učenici:

- * Nadia Kurt
- * Azra Kevelj
- * Dino Alikalfić
- * Hana Loose
- * Merima Kazazić
- * Zara Vejzović

Ponosni smo na naše učenike koji su školu predstavili na lijep i dostojanstven način te pokazali interesovanje za učenje, saradnju i lični razvoj.





POTPISAN PROTOKOL O SARADNJI ŠKOLA



IZMEĐU BURSE I MOSTARA

U periodu od 31. maja do 4. juna direktorica naše škole, **Edna Isić-Balić**, boravila je u gradu Bursi (Turska). Povod posjete bila je svečana ceremonija potpisivanja „Protokola bratskih škola“, projekta koji je povezoao 20 škola iz Burse sa 20 osnovnih i srednjih škola iz Mostara.



Ceremonija je održana u prisustvu pokrajinskog direktora nacionalnog obrazovanja **Gürhana Çokgezera**, ministra obrazovanja, nauke, kulture i sporta HNK, **prof. dr. Adnana Velagića**, njegovog savjetnika **mr. Nijaza Kurtovića**, predsjednika Gradskog vijeća Mostara **dr. Đanija Rahimića**, načelnika Odjela za društvene djelatnosti **Bože Ćorića**, te šefa Službe za odgoj, obrazovanje, mlade i sport **dr. Mustafe Džafića**.



Potpisivanjem ovog protokola napravljen je važan korak ka jačanju saradnje u oblasti obrazovanja između Mostara i Burse. Cilj saradnje je razmjena iskustava, zajednički projekti, povezivanje učenika i nastavnika te razvoj prijateljstva i međukulturnog razumijevanja.



Tokom posjete delegacija je obišla tehnološke institute, muzeje i prirodne znamenitosti ove pokrajine, upoznavajući se s primjerima dobre prakse u obrazovanju i savremenim pristupima učenju.



Direktorica je prenijela srdačne pozdrave naše škole pobratimskoj školi **Atatürk Ortaokulu**, direktoru Haydaru Akinu, kao i njihovim učenicima i nastavnicima.

Radujemo se budućim zajedničkim projektima i nastavku uspješne saradnje između Mostara i Burse!

POBRATIMSKA ŠKOLA

ATATÜRK ORTAOKULU
BURSA, TURSKA



Atatürk Ortaokulu



20 ŠKOLA
IZ BURSE



20 ŠKOLA
IZ MOSTARA



48

JEDNA MISIJA
BOLJA BUDUĆNOST NAŠE DJECE



OBRAZOVANJE SPAJA
PRIJATELJSTVO TRAJE



UČENJE, RAZMJENE ISKUSTAVA I PRIJATELJSTVO



“*Obrazovanje je najmoćnije oružje koje možete koristiti da promijenite svijet.*


Nelson Mandela




Posjeta Srebrenici

Dana 06.04. sa svojim razredom posjetila sam Potočare u Srebrenici. To je bio jedan od najtužnijih, ali i najvažnijih izleta na kojima sam ikada bila. Ova posjeta mi je pomogla da bolje razumijem šta se dogodilo u prošlosti i koliko je važno čuvati mir i poštovati sve ljude. Kada smo stigli u Potočare, prvo smo posjetili Memorijalni centar Srebrenica. Tamo smo vidjeli veliki broj bijelih nišana koji predstavljaju žrtve genocida. Taj prizor je na mene ostavio veoma snažan utisak. Dok sam gledala toliki broj mezarja, osjećala sam tugu, tišinu i poštovanje prema svim nevinim ljudima koji su izgubili živote. Tokom posjete slušali smo priče o događajima iz jula 1995. godine. Gledali smo fotografije, lične predmete i razne dokumente koji svjedoče o stradanju ljudi u Srebrenici. Posebno su me pogodile priče porodica koje su izgubile svoje najmilije. Tada sam shvatila koliko rat može donijeti boli i patnje. Posjetili smo i bivšu Fabriku akumulatora u kojoj se danas nalazi dio muzejske postavke. Tu smo mogli vidjeti video snimke i čuti svjedočenja preživjelih. Atmosfera je bila veoma emotivna i cijeli razred je bio tih i zamišljen. Ovaj izlet je na mene ostavio snažan utisak. Naučila sam koliko je važno da se ovakvi događaji nikada ne zaborave i da svi trebamo širiti mir, toleranciju i poštovanje među ljudima. Smatram da bi svaka mlada osoba trebala posjetiti Srebrenicu kako bi bolje razumjela historiju i naučila cijeniti slobodu i život.

Sara Macić, VIIIa





Trči, hodaj, navijaj, učestvuj i podrži svoju školu!

Udruga „Zdrav život – Kinezis” u sklopu 10. Mostar Run Weekenda, koji se održao od 20. – 22. 3. 2026. godine, omogućila je svim osnovnim i srednjim školama na području Grada Mostara da se uključe u poseban humanitarni projekt koji spaja obrazovanje, umjetnost, kretanje i zajedništvo –humanitarnu utrku 4K pod sloganom: „Trči, hodaj, navijaj, sudjeluj i podrži svoju školu!

Naša škola je bila među jedanaest mostarskih škola koje su doprinijele promociji ovog događaja, podržavajući učesnike polumaratona i učestvovanjem u humanitarnoj utrci 4k.

Učenice devetog i šestog razreda sa nastavnicom Alisom Trbonja- Kahrیمان su volonterskim radom promovisale našu školu u sklopu humanitarnog projekta koji spaja obrazovanje, umjetnost, kretanje i zajedništvo. Ove godine sav prihod od kotizacije humanitarne utrke usmjeren je ka školama koje su učestvovalе u humanitarnom projektu, sa jasnom željom da se djeci u mostarskim školama osiguraju kvalitetniji uslovi za učenje i razvoj.

Naša škola je od dobivenih sredstava obezbijedila novu pametnu tablu koja će nastavni proces učiniti efikasnijim, a učenicima omogućiti interaktivno učenje i olakšati usvajanje znanja.

Aktivnim učešćem i podrškom ovog jedinstvenog projekta, dodatno smo ojačali osjećaj za zajednicu, inkluzivno društvo i proaktivno djelovanje, koje se razvija prirodno i van zidova naše škole.



PRODUŽENI BORAVAK



Učimo, igramo se i rastemo zajedno!

Produženi boravak nije samo vrijeme koje učenici provode prije i poslije nastave, nego mjesto gdje djeca uče, razvijaju prijateljstva, otkrivaju svoje talente te se osjećaju sigurno i prihvaćeno. Svaki dan u produženom boravku ispunjen je različitim aktivnostima koje potiču dječiju kreativnost, maštu, samostalnost i međusobno poštovanje.



KREATIVNOST I MAŠTA

Poseban dio naših aktivnosti odnosi se na kreativne radionice. Djeca rado crtaju, slikaju, izrađuju radove od papira, kartona i prirodnih materijala, te kroz različite tehnike razvijaju finu motoriku. Veliku pažnju posvećujemo i obilježavanju važnih datuma i praznika. Učenici tada kroz razgovor, radionice, igre i grupni rad uče o vrijednostima zajedništva, poštovanja, prijateljstva i ljubavi prema porodici i okolini.



ZAJEDNIŠTVO I PRIJATELJSTVO

Kroz različite društvene igre, kvizove znanja, sportske aktivnosti i zajedničke zadatke učenici uče kako saradivati, pomagati jedni drugima i poštovati različitosti. Djeca svakodnevno razvijaju komunikacijske vještine, uče kako riješiti nesuglasice na lijep način i kako biti podrška svojim prijateljima.



UČENJE I RADNE NAVIKE

Pored zabavnih aktivnosti, učenici u produženom boravku razvijaju i radne navike. Vrijeme je organizovano tako da djeca imaju priliku završiti školske obaveze, ponoviti gradivo i dobiti podršku u učenju. Trudimo se da učenje bude zanimljivo i prilagođeno svakom djetetu, kako bi učenici razvili motivaciju za rad.



OSMIJESI KOJI OSTAJU ZAUVJEK

Posebnu vrijednost produženog boravka čine osmijesi, prijateljstva i lijepe uspomene koje nastaju svakoga dana. Svaki dan donosi nove ideje, nove igre i nova iskustva koja obogaćuju dječije odrastanje.



STRUČNO USAVRŠAVANJE NASTAVNIKA

Seminar o inkluziji učenika s ADHD-om u Hotelu Mostar održan je seminar na temu „Integracija učenika s ADHD-om u redovne razrede“.

Cilj je bio osnažiti nastavnike i saradnike za uspješniju inkluziju učenika s poremećajem pažnje i hiperaktivnošću.

Na seminaru su učestvovalе učiteljice Alma Berberović i Almedina Bašić te asistentice Amila Ždralović i Mediha Mrndžić.

Nastavni kadar naše škole pohađao je stručni seminar na temu „Integracija učenika s ADHD-om u redovne razrede“.

Cilj seminara bio je pružiti nastavnicima, stručnim saradnicima i roditeljima praktična znanja i alate za uspješniju inkluziju učenika s poremećajem pažnje i hiperaktivnošću (ADHD) u redovni obrazovni proces.

Seminaru su prisustvovalе učiteljice Alma Berberović i Almedina Bašić, te asistentice u nastavi Amila Ždralović i Mediha Mrndžić.



6.11. i 7.11.2025. godine učiteljice Almedina Bašić, Minela Gološ -Šuta i nastavnica bosanskog jezika i književnosti Selma Mujan, učestvovalе su na edukaciji „Kamišibaj tehnika u odgojno-obrazovnom radu sa djecom“.

Učesnici su imali priliku upoznati se s ovom jedinstvenom japanskom tehnikom pripovijedanja kroz slike — spojem umjetnosti, naracije i pedagogije.

Nastavnice engleskog jezika Mersiha Šuta i Nina Džiho, 27. 10. 2025. godine, prisustvovalе su seminaru pod nazivom “I wonder...: Visible thinking in the language classroom”, održanom u prostorijama Pedagoškog zavoda Mostar. Seminar je organizovan u saradnji sa Oxford University Press i Malik Books Sarajevo, a predavačica je bila Charlotte Rance, stalna saradnica Oxford University Press-a.





U periodu 20. i 21. januara 2026. godine, učitelji i pedagog naše škole učestvovali su u stručnoj edukaciji „Metodologija usmjerena na dijete – početni trening“, u organizaciji Pedagoškog zavoda Mostar.

Edukacija je održana u SOS Porodičnom centru Mostar i bila je usmjerena na savremene pristupe nastavi, metodologiju usmjerenu na dijete, stvaranje poticajnog okruženja za učenje te integrisano i tematsko planiranje.

Stečena znanja i vještine doprinijet će unapređenju nastavne prakse i kvalitetnijem radu s učenicima.

Dana 15. 1. 2026. godine, u organizaciji MIOS-a Tuzla, u prostorijama Osnovne škole Gnojnice, učiteljice naše škole Almedina Bašić, Minela Gološ Šuta i asistentica Dženeta Greljo, učestvovala su na edukaciji na temu „Učenje osnovnih naučnih koncepata u ranom školskom uzrastu“.

Kroz praktičan rad i izvođenje eksperimenata, edukacija je pokazala da nauka nije nikakav bauk – naprotiv, može biti veoma zanimljiva i inspirativna! Nova znanja i ideje učesnice će prenijeti svojim učenicima i tako dodatno potaknuti njihovu radoznalost i ljubav prema učenju.




U organizaciji Muftijstva mostarskog, u Mostaru je 21.1.2025.godine održan stručni seminar za vjeroučitelje islamske vjeronauke. Cilj seminara bio je unapređenje komunikacije u nastavi, jačanje inkluzivnog i individualiziranog pristupa učenicima te osnaživanje rada s darovitom djecom i u savremenoj, digitalnoj nastavi. Među predavačima bila je i naša nastavnica islamske vjeronauke Elvedina Kazazić, koja je govorila na temu „Iskustva u nastavi islamske vjeronauke u radu sa darovitom djecom“




Dana 9. marta, naša asistentica Amila Ždralović prisustvovala je interaktivnoj radionici „Make and Take“, održanoj u JU Centru za odgoj, obrazovanje i podršku „Los Rosales“ Mostar, u saradnji s humanitarnom organizacijom „Back & Back“ iz SAD-a. Radionicu su vodile dr. Amanda Blackwell i dr. Karla Armendariz, a fokus je bio na savremenim načinima komunikacije, korištenju aplikacija i izradi vizualnih materijala prilagođenih potrebama djece s poteškoćama u razvoju. Cilj edukacije je unapređenje inkluzije i pružanje kvalitetnije podrške djeci u različitim okruženjima.

Veliko interesovanje za radionicu potvrđuje značaj ovakvih edukacija u savremenom obrazovanju.



U mjesecu martu u našoj školi održana je edukativna radionica za nastavnike predmetne i razredne nastave na temu upravljanja razredom i discipline. Kroz interaktivan rad, razmjenu iskustava i konkretne primjere iz prakse, razgovaralo se o svakodnevnim izazovima u učionici te načinima izgradnje pozitivne i poticajne radne atmosfere. Poseban fokus bio je na razumijevanju ponašanja učenika, dosljednosti u radu i važnosti zajedničkog pristupa. Radionicu je vodila školski psiholog Saudina Udovičić. Zahvaljujemo svim učesnicima na aktivnom učešću, saradnji i spremnosti na zajedničko usavršavanje.



U organizaciji Pedagoškog zavoda Mostar održana je konferencija „Promjena počinje u mojoj učionici – nastavnici nastavnicima“, posvećena razmjeni znanja, iskustava i primjera dobre nastavničke prakse. Našu školu uspješno su predstavile nastavnice Mersiha Šuta, Alisa Trbonja-Kahriman, Elvedina Kazazić i Dženita Pejak, prezentirajući stručne i istraživačke radove.



Zlatno pero

ŠKOLSKA TAKMIČENJA

“
Znanje je moć
koja otvara vrata
budućnosti.
”

PONOS NAŠE ŠKOLE!



BOSANSKI JEZIK I KNJIŽEVNOST

VI RAZRED

- 1 Iman Terzić
- 2 Mona Terzić
- 3 Farah Ćosić

VII RAZRED

- 1 Naila Vele
- 2 Anida Duraković
- 3 Dino Alikalfić

VIII RAZRED

- 1 Nedim Agić
- 2 Farah Mahić
- 3 Ada Lakišić

IX RAZRED

- 1 Lejla Maksumić
- 2 Defne Filibeli
- 3 Zara Ćurić



ENGLISKI JEZIK

VI RAZRED

- 1 Neilan Spahalić
- 2 Ela Pajić
- 3 Ida Hadžić

VII RAZRED

- 1 Hana Loose
- 2 Amila Mustafić
- 3 Anida Duraković

VIII RAZRED

- 1 Nedim Agić
- 2 Ada Lakišić
- 3 Zara Vejzović

IX RAZRED

- 1 Defne Filibeli
- 1 Zara Ćurić
- 2 Anej Branković
- 3 Sandi Kajtaž

ABC



NJEMAČKI JEZIK

VI RAZRED

- 1 Hana Pita
- 2 Neilan Spahalić
- 3 Farah Ćosić

VII RAZRED

- 1 Amila Mustafić
- 2 Maia Zukanović
- 3 Dino Alikalfić

VIII RAZRED

- 1 Sara Macić
- 2 Nedim Agić
- 3 Merima Kazazić

IX RAZRED

- 1 Lejla Maksumić
- 2 Zara Ćurić
- 3 Adna Hidović



Spelling
Bee

SPELLING BEE CHAMPIONS

Takmičenje iz engleskog jezika za učenike V razreda.

- 1 Una Bošnjic
- 2 Danis Ćemalović
- 3 Vanja Lav Sasenović



Naši učenici – naš ponos! Hvala vam što na najbolji način predstavljate našu školu.



ŠKOLSKA TAKMIČENJA

“ Znanje je moć koja otvara vrata budućnosti. ”



Matematika

VI RAZRED

1. Iman Terzić
2. Edin Đukić
3. Neilan Spahalić

VII RAZRED


1. Dino Alikalfić
2. Naila Vele

VIII RAZRED

1. Farah Mahić
2. Nedim Agić
3. Ada Lakišić

IX RAZRED

1. Defne Filibeli
2. Nejlja Vrce
3. Zara Ćurić




Fizika

VIII RAZRED

1. Ada Lakišić
1. Farah Mahić

IX RAZRED

1. Defne Filibeli
2. Zara Ćurić
3. Nejlja Vrce



Islamska vjeronauka

8. RAZRED

1. Merima Kazazić
2. Hana Pehilj
3. Merjem Memić

9. RAZRED

1. Lejla Maksumić
2. Nejlja Baralija
2. Emir Kevelj
3. Zaid Macić



Historija

Prvo mjesto/ ekipno takmičenje

- Nejlja Ćerić
Defne Filibeli
Jan Đonko
Džan Kajtaž



STARI VIJEK
3000 p.n.e. – 476.



SREDNJI VIJEK
476. – 1492.



NOVI VIJEK
1492. – danas.



HISTORIJA

Spoznaj prošlost,
razumi sadašnjost,
kreiraj budućnost.

- GLAVNE EPOHE
- PRAHISTORIJA
 - STARI VIJEK
 - SREDNJI VIJEK
 - NOVI VIJEK



KANTONALNO TAKMIČENJE

Matematika

Na kantonalnom takmičenju iz matematike održanom 28. marta 2026. godine, učenici naše škole ostvarili su zapažen uspjeh u izuzetno jakoj konkurenciji.

★ POSTIGNUTI REZULTATI ★

VII razred

- 3. mjesto – Naila Vele
- 5. mjesto – Dino Alikalfić

VIII razred

- 2. mjesto – Ada Lakišić
- 5. mjesto – Farah Mahić i Nedim Agić

IX razred

- 11. mjesto – Defne Filibeli
- 13. mjesto – Nejla Vrce



Bosanski jezik i književnost



- Na Kantonalnom takmičenju održanom 25. aprila 2026. godine, ekipa naše škole u sastavu Naila Vele, Anida Duraković i Dino Alikalfić ostvarila je izuzetan rezultat.
- U pratnji nastavnice Mirhunise Idrizović, naši učenici su osvojili drugo mjesto u ukupnom poretku.
- Posebno ističemo uspjeh učenice Naile Vele, koja je zauzela drugo mjesto u pojedinačnoj konkurenciji.

Čestitamo učenicima i nastavnicima na trudu, znanju i dostojnom predstavljanju škole. Neka vam ovaj uspjeh bude motivacija za buduće izazove. Bravo!

Čestitamo učenicima na postignutim rezultatima, nastavnicima Adisi Obradović-Dilberović i Ramizu Tikveši na uspješnom mentorstvu, te roditeljima na pruženoj podršci.

Bravo!





ENGLISKI JEZIK



▶ Na Kantonalnom takmičenju iz engleskog jezika, održanom 18. aprila 2026. godine u Konjicu, našu školu predstavljale su učenice Zara Ćurić, Defne Filibeli i Aneju Branković.

U izuzetno jakoj konkurenciji naše učenice pokazale su visok nivo znanja i ostvarile zapažene rezultate. Posebno smo ponosni na uspjehe koje su ostvarile:



Zara Ćurić

drugo mjesto u ukupnom plasmanu



Defne Filibeli

treće mjesto u ukupnom plasmanu



★ Ovaj uspjeh potvrda je njihovog kontinuiranog rada, talenta i posvećenosti izučavanju stranih jezika, ali i kvalitetnog obrazovnog procesa koji negujemo u našoj školi.

★ Čestitamo Zari, Defne i Aneju na postignutim rezultatima, kao i njihovoj mentorici, nastavnici Nini Džihović, na stručnoj pripremi, podršci i predanom radu.



- Well done! -



MEĐUNARODNO TAKMIČENJE

- Engleski jezik



Naši učenici **Farah Mahić** i **Nedim Agić** ostvarili su izvanredan uspjeh na međunarodnom takmičenju International World Scholar (WSEO). U konkurenciji od **1.866 učesnika**, oboje su izborili plasman u finale održano 23. i 24. aprila 2026. godine.

U finalnom krugu, Farah je osvojila prvo, a Nedim četvrto mjesto. Pod mentorstvom nastavnice Mersihe Šuta, naši učenici su na najbolji način predstavili školu na međunarodnoj sceni.

Čestitamo učenicima na postignutim rezultatima, nastavnici Mersihi Šuta na uspješnom mentorstvu te roditeljima na pruženoj podršci. Bravo!

English

INTERNATIONAL
WORLD SCHOLARS



TIMELINE

Registration	Feb 27 - April 11, 2026
Preliminary	April 12, 2026
Grand Final	April 23-24, 2026

COMPETITION

Level 1	Math, Science, English, Geography
Level 2	Math, Science, English, Chemistry
Level 3	Math, Science, English, Chemistry
Level 4	Math, Science, English

CATEGORY

- Level 1: 7 - 12 years old/primary school students
- Level 2: 13 - 15 years old/secondary school students
- Level 3: 16 - 18 years old/high school students
- Level 4: above 18 years old/adult

GRAND PRIZE



Register On : [isoc-olympiad.com](https://www.isoc-olympiad.com)

CP: +62 851-6732-6845 (cs.pateron)
isoc.olympiad@gmail.com



Ada Lakišić na Federalnom takmičenju iz matematike



Sa ponosom ističemo uspjeh naše učenice 8. razreda **Ade Lakišić** koja je predstavljala našu školu na Federalnom takmičenju iz matematike, pod mentorstvom predmetnog nastavnika **Ramiza Tikveše**.



Čestitamo Adi na uloženom trudu i dostojnom predstavljanju škole te joj želimo mnogo uspjeha u daljem školovanju i budućim takmičenjima.



BOSNA – DOMOVINA I MATI

LITERARNI I LIKOVNI KONKURS POVODOM DANA DRŽAVNOSTI
BOSNE I HERCEGOVINE



NAGRAĐENI LITERARNI RADOVI

od II do V razreda

1. Mak Ivetić Va
2. Merjem Balić IIb
3. Vanja Lav Sasenović V b

od VI do IX razreda

1. Zara Jusupović IXb
2. Merjem Memić VIIIa
3. Dino Alikalfić VIIb

NAGRAĐENI LIKOVNI RADOVI

od II do V razreda

1. Elif Osmanović III a
2. Arslan Malkoč II a
3. Lena Klarić V b

od VI do IX razreda

1. Arslan Hodžić VIIb
2. Merjem Husković VIIa
3. Lana Begić VIa

Bosna – domovina i mati

Bosna je moja domovina, moja mati. Ona me uči da se voli tiho, ali duboko, da se čuva, ona što je sveto, i da se nikada ne zaboravi ko si.


U njenim rijekama ogleda se naša prošlost, a u planinama naša snaga. Miris njenih šuma, zvuk njenih gradova i toplina njenih ljudi nose nešto što srce može razumjeti.

Bosna je mati koja grli sve svoje sinove jednako i kad su daleko i kad su blizu. Njene ruke su široke, a duša beskrajna. I kad je ranjena, nikad ne prestaje voljeti. I kad je tiha, najglasnije govori.

Ko jednom osjeti Bosnu, nosi je cijeli život. Jer, domovina nije samo mjesto. Domovina je majka.

A Bosna je upravo to-mati koja nas čuva i kada to mi ne primjetimo.

Mak Ivetić, Va



NAGRAĐENI LIKOVNI RADOVI





Bosna i Hercegovina – domovina i mati

Bosno moja, ti nisi samo zemlja -
ti si rana što pjeva.
Ti si glas što se ne čuje,
al' u tišini odzvanja kao molitva.

Tvoje planine nisu samo kamen,
to su dlanovi predaka što nas grle iz zemlje.
Tvoje rijeke nisu samo voda,
to su suze što teku - i ne presuše nikada.

U tebi svako dijete nosi
jedan komad ovog neba u srcu,
a svaka majka strepi,
ali joj se suza ne vidi.

Bosno,
koliko puta su te lomili,
a ti si iz svake pukotine rasla -
kao ruža iz pepela.

Hercegovino, sestro od kamena i sunca,
u tvojim vinogradima raste bol i ponos,
a Neretva šapuće stihove
onima što su otišli,
i onima što te još uvijek sanjaju.

Bosno i Hercegovino,
zemljo od suza i svjetlosti,
naučila si nas da voljeti znači -
ostati,
i kad svi odu.

Tvoje ime nosim kao dah,
kao zavjet, kao molitvu.
I dok god srce kuca,
ono kuca za tebe -
moja jedina, Bosno i Hercegovino!

Zara Jusupović IXb

Moja domovina kao moja mati

Moja domovina je kao moja mati,
ona me voli, ona me shvati

Njene su gore kao majčine ruke.
što čuvaju djecu od svake muke.

Kad ptica u zoru pjesmu zapjeva
domovina s osmijehom mene doziva.

I svaki kamen, i svaki cvijet,
govori : voli i čuvaj ovaj svijet.

Zato je ljubim i srcem je pratim,
moja domovina je kao moja mati.

Merjem Balić II b



Mati

Moja je mati puna nade,
kaže da ću biti dobar čovjek jednog dana.
Da ću znati šta je važno,
a šta samo prođe i nestane.

I moja je zemlja takva,
velika kao majka, strpljiva i mila,
gleda nas kako rastemo,
kao da kaže: polako, imate vremena.

Kod nas je sve šareno.
Livade kao razred kad crtamo,
jesen kao puna kutija tempera,
a djeca na igralištu kao različite sličice,
ali sve idu u isti album.

Moja zemlja je šarena i puna nade,
jer gleda nas, djecu što rastemo u njoj.
I tiho vjeruje, kao i moja mati,
da ćemo jednom mi biti razlog da se kaže,
bilo je vrijedno čekati.

Vanja Lav Sasenović Vb

Domovina BiH, moja mati

Kad zatvorim oči zamislim svoju domovinu, i prvo što vidim jeste njeno veliko, toplo srce koje kuca ispod naših planina. Bosna i Hercegovina nije samo zemlja u kojoj živim, ona je moja mati, koja me štiti, grli i uči kako da volim. Nekad mi se čini da svaka kap kiše što padne po našim krovovima nosi dio njene tihe brige, a svaki sunčani dan dio njene nježnosti. Moja domovina miriše na jutarnju kahvu koju piju stariji ispred kuće, na somune koji se peku pred Bajram, na čiste rijeke koje se presijavaju kao da u sebi nose bisere. Kada hodam ulicom svog grada, osjećam kao da me svaki kamenčić poznaje, kao da mi šapće priče o ljudima koji su ovdje živjeli prije mene i koji su se borili za njen opstanak. Bosna i Hercegovina je nekad tiha i nježna, a nekad snažna i ponosna. Njene planine stoje kao ogromni čuvari, hladni i visoki, ali u svojoj tišini uvijek dobri. Kada gledam Velež, Prenji ili Vlašić, imam osjećaj da gledam ramena moje majke, široka i sigurna, na koja uvijek mogu nasloniti svoje brige, a naše rijeke, kao da plaču i smiju se u isto vrijeme, noseći sa sobom sve ono što mi nekad ne možemo da izgovorimo. Često čujem ljude kako govore da je teško živjeti ovdje, ali tada pomislim „teško je i majci ponekad, ali ona ne prestaje da voli svoje dijete”. Tako je i moja domovina. Ponekad rana boli, ali ljubav ostaje. U svakoj ulici, svakom gradu, živi po jedna uspomena koja govori da smo neko k'o zna preživjeti, neko k'o zna voljeti i neko k'o zna početi ispočetka. Najviše volim trenutke kada putujem kroz Bosnu i Hercegovinu. Kada auto polako klizi kroz doline, meni se čini kao da gledam album pun uspomena. Selo uz put, dim iz dimnjaka koji se diže pravo u nebo, stara nana koja sjedi pred kućom i maše prolaznicima. Sve to u meni budi osjećaj topline u grudima, kao da mi neko šapće „ovdje pripadaš”. Volim svoju domovinu jer je iskrena, jer se ne pretvara. Ponekad je umorna, ponekad je tužna, ali i tada izgleda lijepo. Kao majka koja je sve prošla, ali se i dalje smiješi svom djetetu. Unjenim bojama vidim hrabrost, vjeru i ljubav. U njenom narodu snagu i dobrotu koja se ne može kupiti. Kad mislim o budućnosti, zamišljam sebe kako jednoga dana možda odem negdje daleko, ali znam da ću u srcu uvijek nositi ovu zemlju: njen miris, njene divne ljude, rijeke i brda. Jer, čovjek možda promijeni adresu, ali integritet i korijene nikad. Zato kažem, s ponosom i ljubavlju: Domovina BiH je moja mati i - uvijek će biti.

Merjem Memić, VIIIA

Bosna i Hercegovina- domovina i mati

Moja jedina domovina Bosna i Hercegovina danas slavi svoj dan, 25. novembar.

Ona nije samo mjesto na karti, već moj dom, moja priča, moja mati.

Bosna je zemlja planina i rijeka, šuma i livada.

Mnogo volim planinariti s porodicom, osvajati visoke brojne vrhove koje moja Bosna nudi i udisati oštri planinski zrak. Kada padne snijeg, planine se pretvaraju u mudre čarobnjake, obučene u bijele plaštove, sa šeširima od maglovite izmaglice, koji stvaraju čarolije od svjetlucah pahulja. Drveće, ti tihi čuvari šuma, savijaju grane pod težinom snijega, a njihovi ledeni ogrtači sijevaju poput čarobnih štapića. U toj bijeloj tišini osjeća se ljubav majke koja štiti i grli, baš kao što Bosna grli svoje ljude.

Naše rijeke i jezera su duša Bosne. Ponekad idem s tatom u ribolov i dok čekamo da riba zagrije, slušamo šum vode i ptice u krošnjama. Tatin osmijeh čini da tišina oko nas postane glasnija od sreće. Tada se osjećam još bliže svojoj domovini, postajemo jedno i sve moje brige nestaju.

Noću nebo postaje more prekiveno hiljadama zvijezda. Kada padne zvijezda, zatvorim čvrsto oči, zamislim svoju želju i pustim je da je nosi visoko iznad planina i rijeka, znajući da snovi imaju moć da putuju zajedno s čarolijom Bosne. Mama uvijek kaže da ne smijem otkriti svoju želju kada padne zvijezda, ali ja znam da je najvažnije to što smo zajedno.

Ali ono najlepše u mojoj zemlji su njeni ljudi, koji su dobri, topli i gostoljubivi. Ljudi ovdje pomažu jedni drugima i uvijek pronalaze razlog za smijeh. U Bosni se za svakog gosta uvijek nađe mjesto za stolom te ih naša bogata kuhinja oduševljava.

Moja domovina me uči da budem skroman, ponosan i zahvalan.

Gdje god da odem, uvijek sa nestrpljenjem čekam da se vratim kući. Sa prijateljima uvijek igram lopte, vozimo bicikla i smijemo se dok grad vrvi životom. U tim trenucima osjećam se slobodno i sigurno.

Bosna je dio mog bića, utkana u moje misli i srce, i ne može se izbrisati!

Dino Alikalfić VIIb

Pohvaljeni radovi na konkursu „Bosna i Hercegovina-domovina i mati”

Bosna, domovina i mati

U vremena davna, kada pisma ni na pomolu nije bilo,
Vrijedni čovjek zemlje ove, u pećini je svoje gnijezdo svio,
Kroz vijekove niču naselja nova, ljudi prave oruđa, a dolaze i nova slova,
Od Ilira do Rimljana svijet se širi, Bosna stoji vječna i civilizacije miri.

U dolinama rijeka, pod sjenom planine, nikoše gradovi i jedno vječno ime, Kulin ban Bosnom je hrabro hodio, mir i blagostanje tada svima donio,

Zatim Tvrtko kralj krunu stavi, u ruci mu mač i knjiga i time Bosnu brani,
Štit mu pravda, ljiljan i svak' mu se divi, na kamenu i srcu urezano ime Bosna živi.

Kroz vijekove se proteže i priča stara, kada Bosna pade pod ruke sultana cara,
S minareta ezani pozdraviše more, narod obgrli tiho te nove zore, Sarajevo, Mostar i čudesan Stari most, svjedoče da su bili kod nas dobar gost,

I danas kad' vjetar s istoka krene,
Bosna tiho priča da prošlost nikada ne vene.

Kad' Austro-Ugarska kroči na prag, Bosna zadrhti, al' osta jaka i tad,
Topovi grme, a car daje glas, narod čvrsto stoji, jer doći će spas,
Bosna se mijenja, al' duša hrabro stoji, tiho i mudro svoju novu sudbinu kroji,
Prođu godine, a prođe i car, sve osta prošlost, a Bosna zadrža stari žar.


Poslije su je tresla dva svjetska rata, al' strpljivo je čekala da otvori suncu vrata, Držala je snaga, ljubav i nada, jer Bosna je ponosna, i nikada ne pada,

Godina dođe devedeset druga, na nju se golema tad sruči tuga,
Zaplaka majka nad sinom svojim, koji život dade da se barjak Bosne i dalje vijori. Diže se moja Bosna iz dima, lekciju snage očita neprijatelju, a i svima, Rođendane svoje ponosno slavi, jer zna da bi za nju svi mi život dali, Ostani hrabra i kada grme oluje, nek' se tvoja himna do kraja svijeta čuje, Mi ćemo te uvijek najdražom zvati, jer ti si Bosno nama i domovina i mati.

Farah Mahić VIIIa



Leena-Selin Kajić IIIa



Lara Krpo IIIb

Pohvaljeni radovi na konkursu „Bosna i Hercegovina-domovina i mati”

Bosna – domovina i mati

Zemljo si, Bosno, od kamena tkana,
Od ponosa snaga, od borbe naga.
K’ o oblak nezavisna, kršna i čedna –
Bosno, zemljo jedina, jedna.

Ne upoznah nigdje takve planine,
Ni rijeke, polja, krajine i ravnine.
Svaki dio tebe jedno srce ima,
I glas što bosansku smirenost skriva.

Dok putujem gradovima tvojim,
U srcu svom smatram ih svojim.
I djedovi naši živote su dali –
Za tvoju slobodu ponosno pali.

Jedna si, jedina, takva i ostani,
Za narod svoj domovina bolja postani.
Ostat ću uvijek samo tvoj,
Jer ti si, Bosno – kraljica srca mog.

Benjamin Peco, VIa



Vedran Avdić VIIIa



Iman Ćupina VIIb



Delila Husković IIB

Od malena učio me stari – Velež, porodica za sva vremena

Tokom školske 2025/2026. godine 118 učenika naše škole učestvovalo je na konkursu „Od malena učio me stari – Velež, porodica za sva vremena“. Kroz video, literarne i likovne radove učenici su pokazali ljubav prema klubu, te istakli važnost sporta, zajedništva i pripadnosti.

KATEGORIJA: VIDEO KLIP

Razredna nastava:

Mili Novaković IIa

Predmetna nastava:

Nedim Agić VIIa i Sara Macić VIIa

KATEGORIJA: LITERARNI RADOVI

Razredna nastava:

Mak Salčin, IIa

Nadia Šišić, IIb

Noa Dandić, IIIb

Predmetna nastava:

Farah Mahić, VIIa

Merjem Memić, VIIa

Zara Vejzović, VIIIb

KATEGORIJA: LIKOVNI RADOVI

Razredna nastava:

Dunja Šahinagić, IIa

Ena Ključanin, IIa

Ayše Filibeli IVb i Uma Spahić IIIb

Predmetna nastava:

Edi Čampara, IXa

Zara Jusupović, IXb

Nadia Mišić, IXb



Velež porodica za sva vremena

Postoje lekcije al' ne iz knjige, već iz tatinog pogleda i glasa,
Dok pruža ruke ka zelenoj travi, gdje igraju Rođeni ukrasi Mostara,
Od rođenja učio me stari, crvenu boju ne biraš, ona ti sama dođe,
Srce prepozna ljubav, a Velež je ljubav koja nikad' ne prođe.

Govorio mi uporno i tiho: „ Zapamti sine moj, Velež nije samo klub, to je život tvoj“ ,
Od dvadeset druge do današnjih dana, on je snaga Mostara grada,
Kao mala shvatih ja, Velež je porodica za vremena sva,

S njim ja naučih, šta znači biti vjeran, i da klub od rođenja može biti samo jedan.

Oteše mu kuću, oteše mu dom, al' nisu nikad ljubav iz srca mog,
Tribine su nestale, al' ostao je glas, jer Velež živi vječno u svakom od nas,
Tjerali su godine prošle, mijenjali vremena, a Rođeni ostaše vjera nikad nepromijenjena,
Uzeše mu stadion i zelenu travu, al' nikad nisu mogli njegovu slavu.

Napraviše Rođeni novu kuću svoga sna, gdje se pjesma s tribina čuje do neba,
Prodoše i godine u kojim je bola bilo, a srce navijača nikad se nije slomilo,
Prolama se nebom poznata melodija sreće, a mi pokazasmo svima,

„Pjesma o Veležu nikad' prestat' neće“

Dok koračamo ka Rođeni Areni, crvenim zastavama ovijeni,
Srce od ponosa zadrhti tada, jer tu počinje priča Veleža i Mostara grada,
„Rođeni dal' nas čujete?“ sa tribina se ori, „Hoćemo pobjedu“ nebo para glas,
Crvena armija kao bedem stoji i čeličnog srca vječno je uz vas.

Velež je naslijeđe koje nema cijenu, prkosi zlu, nepravdi i lošem vremenu,
Mostar može biti i bez svjetla i sna, a bez Veleža svoga ne može nikada,
I danas pamtim tatine riječi: „Zapamti sine svi smo mi, od istog sna satkani“,
Jer Velež je porodica za sva vremena, vječna ljubav od rođenja stvorena.

Farah Mahić VIIIa



FK VELEŽ MOSTAR

Velež porodica za sva vremena

Od malena učio me stari o jednoj ljubavi koja se ne objašnjava, nego se osjeća negdje duboko u grudima. Kao tiha melodija koja nas prati kroz život i vrati se svaki put kad vidim crvenu boju. Ta ljubav ima ime, FK Velež Mostar. Kao mala često nisam razumjela zašto jedan klub može značiti toliko, ali sam gledala svog tatu tokom Veležovih utakmica. U njegovim očima su se cijelo vrijeme smjenjivale emocije, jednu sekundu nada, drugu sekundu briga, pa onda neočekivana radost. Tada sam shvatila da Velež nije samo fudbalski klub i devedeset minuta igre, on je nešto mnogo veće. Velež je poseban osjećaj, navika koja polako postaje dio tebe kako odrastaš. Crvena boja Veleža za mene je poput plamena koji nikada ne prestaje gorjeti, samo se nekad malo utiša. Ona podsjeća na srce koje jače zakuca kad utakmica počne i na glasove navijača čiji se glasovi spajaju u jednu veliku pjesmu. Ali uz crvenu, tu su i druge boje koje u meni bude posebne slike. Bijela me podsjeća na čistu i iskrenu ljubav prema klubu, onu koja ne traži ništa zauzvat i koja ostaje ista bez obzira na sve. Žuta me podsjeća na svjetlost i nadu, na one trenutke poslije teških utakmica, ponovo vjerujemo da će doći bolji dani. U takvim trenucima svi koji stoje za Velež dišu istim dahom, a ljubav prema klubu postaje nešto šta povezuje ljude i generacije. Čak i kad smo živjeli u drugom gradu, daleko od Mostara, moj tata je ostao vjerni navijač. To mi je pokazalo nešto šta sam zapamtila za cijeli život, Velež nije samo vezan za stadion ili jedan grad, on živi u srcu. Možeš biti kilometrima daleko, ali ta ljubav putuje s tobom, tiha kao stari prijatelj koji te nikad ne napušta. Za mene Velež je kao član porodice. On je tu kroz loše utakmice koje zaboje, kroz promjene koje dođu iznenada, ali i kroz one najljepše trenutke kada radost preplavi sve oko sebe. Nekad nas razveseli, nekad rastuži, ali uvijek nas okupi oko iste boje, iste pjesme i najbitnije iste ljubavi. Moj stari mi nije pričao samo o Veležu, on mi je pokazao šta znači biti vjeran nečemu šta voliš. Naučio me da se prava ljubav ne mijenja zbog poraza niti nestaje kada je teško. Zato danas znam da Velež za mene nije samo klub. On je divna uspomena, emocija i veliki dio mog odrastanja. Ljubav prema Veležu se prenosi tiho, iz generacije u generaciju, baš kao što je moj tata prenio meni. I zato znam da će ta ljubav uvijek živjeti gdje god me život odvede, jer Velež nije samo ime kluba, Velež je porodica za sva vremena.

Merjem Memić Vllla



Velež-porodica za sva vremena

Kada na teren izađe FK Velež Mostar, to nije samo obična fudbalska utakmica. To je priča o gradu, o tradiciji i o ponosu koji se prenosi generacijama. Velež nije samo klub – on je simbol Mostara, simbol borbe, hrabrosti i nepokolebljive vjere u pobjedu.

Crveni dres koji igrači nose nije samo dio opreme. On nosi težinu historije, uspomena i snova svih onih koji su kroz godine navijali za Rođene. Na terenu se ne bori samo jedanaest igrača, već i cijeli grad koji stoji iza njih. Svaki dodir lopte, svaki sprint i svaki duel podsjećaju da je Velež uvijek bio klub koji se nikada ne predaje.

Snaga Veleža oduvijek je bila u srcu i karakteru. Kada drugi posumnjaju, Rođeni pokažu da se pobjede ne osvajaju samo talentom, nego i vjerom, zajedništvom i borbom do posljednje sekunde. U trenucima kada je najteže, kada protivnik misli da ima prednost, tada se budi onaj pravi veležovski duh – duh koji je kroz historiju donosio velike pobjede i nezaboravne trenutke.

Na tribinama se čuje pjesma navijača koji vjeruju u svoj klub bez obzira na sve. Ta podrška daje dodatnu snagu igračima na terenu, jer znaju da iza njih stoje hiljade srca koja kucaju u istom ritmu. Velež nikada nije bio samo tim – to je porodica, zajednica i identitet jednog grada.

Zato kada počne utakmica, Rođeni ne izlaze na teren da bi samo igrali. Oni izlaze da pokažu karakter, da pokažu ko su i zašto je ime Veleža kroz decenije izazivalo poštovanje. Svaki napad nosi vjeru u gol, svaka odbrana pokazuje odlučnost, a svaka minuta borbe podsjeća da se za ovaj dres daje sve.

I upravo zbog toga, kada se na kraju utakmice oglasi posljednji zvižduk sudije, svi koji vjeruju u Velež znaju da je jedna stvar bila neizbježna – Rođeni su još jednom pokazali svoju snagu. Pobjeda nije samo rezultat na semaforu, već dokaz da duh Veleža nikada ne prestaje živjeti.

Zara Vejzović, VIIIb



Velež – porodica za sva vremena

“Od malena učio me stari – Velež, porodica za sva vremena”

Velež nije samo klub. Velež je prkos i ponos.

Moj tata mi je pričao da je Velež kroz svoju historiju prošao mnogo toga. Bilo je lijepih pobjeda, velikih utakmica i slavnih dana. Ali bilo je i teških vremena, kada je bilo najteže ostati jak. I baš tada se vidio pravi Velež. Nije odustao. Nije se predao.. Uvijek je ustao jači. Tada kaže da je to prkos – kad ti je teško, a ti ideš dalje zajedno glave.

Velež je ponos Mostara. On je simbol ljudi koji vole svoj grad i svoj klub. Kad stojim na tribini i pjevam, osjećam da sam dio te snage. Nije važno protiv koga igramo i gdje igramo. Važno je da smo zajedno. Kroz sve što je prošao, Velež je ostao isti – hrabar, pošten i svoj. To me uči da i ja budem takav. Da budem vjeran, da ne odustajem i da uvijek budem ponosan na ono što volim.

Od malena učio me stari da se neke stvari ne mogu kupiti, nego se nose u srcu. Jedna od tih stvari je ljubav prema Veležu. Kaže mi da Velež nije samo klub, nego porodica za sva vremena.

Još dok sam bio mali, vodio me na stadion. Držao me za ruku i učio me pjesme. Govorio mi je da pravi navijač voli svoj klub i kad je teško, a ne samo kad pobjeđuje. Tako sam naučio šta znači biti vjeran. U našoj kući, kad igra Velež, svi znaju da je poseban dan. Obučemo crveno, podignemo šal i navijamo zajedno. Tada se smijemo, radujemo, ali ponekad i tugujemo. Ali uvijek smo zajedno. Zato tata kaže da je Velež porodica.

Moj dedo je također volio Velež, a tata kaže da je i njega njegov otac učio isto. Tako se ta ljubav prenosi sa koljena na koljeno. Kada sjedimo zajedno i pričamo o utakmicama, osjećam toplinu i ponos jer znam da pripadam toj našoj maloj, ali velikoj porodici.

Jer Velež je više od fudbala. On je srce koje kuca za prkos i ponos.

I ja ću ga voljeti od malih nogu pa dok ne ostarim – baš kako me učio moj stari.

Noa Dandić III b



Moj Velež

Kad Velež igra, srce mi skače,
na stadion jurimo, jače, jače.
Crveni dres i zvijezda sjajna,
to je ekipa hrabra i snažna.
Kad lopta krene prema голу,
mi svi skaćemo gore na stolu.
Navijam glasno sa drugarima,
Mašemo šalovima i zastavama.
Kad Velež pobijedi, radost se čuje
cijeli Mostar od sreće pjeva i bruji.

Velež je ponos, Velež je san,
volim ga svaki novi dan.

Kad porastem velik i jak,
Na tribini ću biti pravi Rođeni junak.



Sportski uspjesi naših učenika



Drugo mjesto u fudbalu!

U organizaciji Sportskog saveza Grada Mostara, učenici naše škole postigli su sjajan rezultat – osvojili su drugo mjesto na gradskom takmičenju u fudbalu! Ponosni smo na njihov trud, timski rad i sportski duh, koji su pokazali tokom svakog meča. Bravo za naše mlade sportiste koji su još jednom dokazali da se upornošću i zajedništvom postižu veliki rezultati!



Drugo mjesto u šahu

1.12.2025.godine, učenici naše škole osvojili su drugo mjesto na takmičenju u šahu koje je organizovao Sportski savez grada Mostara! Ovim uspjehom pokazali su izuzetnu posvećenost, strateško razmišljanje i timski duh. Njihov nastup privukao je mnogo pažnje i pohvala, a mi smo ponosni što su Helena Perotić, Nedim Začinović, Emil Redžić i Sandi Kajtaz našu školu predstavili kao primjer izvrsnosti.



BRAVO NEJLA!



Nejla Ćerić – ponovo prva!

Na školskom takmičenju u cross trčanju za djevojčice koje organizuje Sportski savez Grada Mostara, naša učenica Nejla Ćerić ponovo je briljirala – osvojila je prvo mjesto, i to treći put zaredom!

Čestitamo Nejli na izuzetnom uspjehu, kao i svim našim učenicima koji su pokazali pravi sportski duh i upornost. Bravo!



Ponos naše škole!

U organizaciji Sportskog saveza Grada Mostara danas je održano takmičenje u atletici, a naša učenica Nejla Ćerić ostvarila je izvanredne rezultate:

- 🏅 2. mjesto – 400 m
- 🏅 2. mjesto – 100 m

Snaga, brzina i upornost – sve u jednoj učenici!

Bravo, Nejla! Ponosni smo na tebe i želimo ti još mnogo medalja i uspjeha!

Nejla Ćerić najbolja sportiskinja Grada Mostara

U organizaciji Sportskog saveza Grada Mostara danas je upriličena svečanost proglašenja najboljih sportista, sportiskinja, nastavnika, profesora, te osnovnih i srednjih škola Grada Mostara.

Poseban razlog za ponos donijela nam je naša učenica Nejla Ćerić koja je proglašena najboljom sportiskinjom Grada Mostara u kategoriji učenica osnovnih škola.

Nejla je svojim trudom, talentom i sportskim duhom ostvarila izvanredne rezultate:

- Cross – 1. mjesto
- Atletika 100 m – 2. mjesto
- Atletika 400 m – 2. mjesto

Naši učenici ostvarili su zapažene rezultate i u ekipnim sportovima:

Djevojčice – fudbal – 1. mjesto

Dječaci – fudbal – 2. mjesto

Djevojčice – stolni tenis – 1. mjesto

Šah – 2. mjesto

Čestitamo našoj Nejli, svim našim učenicima, kao i našem nastavniku Ademiru Ajaniću na predanom radu i ostvarenim uspjesima.



ZLATO ZA NAŠE FUDBALERKE!

Učenice osvojile 1. mjesto u fudbalu

Danas je završeno takmičenje u fudbalu za učenice, koje je organizovao Sportski savez Grada Mostara, a naše djevojke su zasjale kao prave šampionke! Uz fantastičnu igru, timski duh i lavovsko srce na terenu, ekipa naše škole osvojila je PRVO MJESTO! Čestitamo našim učenicama i nastavniku Ademiru Ajaniću na vrhunskom rezultatu i predanom radu! Golovi, osmijesi i pobjednički duh – sve je bilo na strani naših fudbalerki danas. Pokazale ste da upornost, zajedništvo i rad donose pobjedu.



Stolni tenis – prvo mjesto!

Učenice naše škole: Nejlja Ćerić, Zara Jusupović i Asya Džanković osvojile su, 3.2.2026. godine, PRVO mjesto na takmičenju u stolnom tenisu u organizaciji Sportskog saveza grada Mostara. Njihov trud, disciplina i sportski duh donijeli su zasluženu pobjedu.



Drugo mjesto na fudbalskom turniru

Na fudbalskom turniru koji se održao 9.4.2026. godine, u organizaciji Srednje građevinske škole, ekipa naše škole ostvarila je sjajan rezultat osvajanjem drugog mjesta. Naši učenici su pokazali borbenost, vještinu i pravi timski duh. Pored sportskog uspjeha, ovakvi događaji su važni za razvoj zajedništva i poštovanja prema protivniku. Čestitke našim momcima na odličnoj igri i dostojnom predstavljanju škole.



MLADI U SAOBRAĆAJU

Na konkursu „Mladi u saobraćaju“, u organizaciji Agencije za bezbjednost saobraćaja HNK, učenici Nedim Agić, Farah Mahić, Sara Macić i Merima Kazazić, pod mentorstvom nastavnice Dženite Pejak, osvojili su glavnu nagradu u kategoriji Foto & Video.

Njihov video-rad prepoznat je po kreativnosti i snažnoj poruci o odgovornom ponašanju u saobraćaju. Ovim uspjehom još jednom su pokazali znanje, talenat i društvenu odgovornost.

Čestitamo učenicima i mentorici.



VELIKO SRCE NAŠIH UČENIKA

Naši učenici pokazali su izuzetnu humanost odlučivši da svoju prvu nagradu – biciklo, osvojenu na konkursu „Mladi u saobraćaju“, poklone Udruženju „Sunce“. Ovim gestom pokazali su da uspjeh ima pravu vrijednost tek kada se dijeli s drugima.

Njihova odluka svjedoči o empatiji, solidarnosti i snažnom osjećaju zajedništva. Ponosni smo na učenike koji svojim postupcima potvrđuju da u našoj školi odrastaju djeca velikog srca.



Vijeće učenika

Vijeće učenika je u proteklom periodu djelovalo kao ključni most između učenika i uprave škole. Održavani su redovni sastanci na kojima su predstavnici svih odjeljenja iznosili prijedloge, pohvale i primjedbe svojih kolega. Ovakav način rada omogućio je da se glas svakog djeteta čuje, promovirajući demokratske vrijednosti i participaciju u školskom životu.

Poseban fokus stavljen je na vršnjačku edukaciju. Umjesto klasičnih predavanja, učenici su preuzeli ulogu predavača, što je značajno povećalo angažman i zainteresovanost njihovih vršnjaka.

Obilježeni su:

- Dan dječijih prava: Kroz radionice o konvenciji UN-a i pravima koja svako dijete posjeduje.
 - Dan tolerancije i Dan mentalnog zdravlja: Razgovori o empatiji, prihvatanju različitosti i važnosti brige o vlastitim osjećajima.
 - Dan osoba s invaliditetom: Podizanje svijesti o inkluziji i uklanjanju barijera u društvu.
- Povodom Dana sigurnosti na internetu, članovi Vijeća učenika su uložili veliki trud u izradu edukativnih brošura. Brošure su sadržavale praktične savjete o zaštiti privatnosti, prepoznavanju opasnosti na mreži i bontonu u digitalnoj komunikaciji te su podijeljene učenicima svih razreda. Obilježavanje Dana ružičastih majica (Pink Shirt Day) bila je jedna od najznačajnijih aktivnosti:
- Dječija konferencija: Organizovan je centralni događaj na kojem se diskutovalo o prevenciji nasilja i načinima rješavanja konflikata mirnim putem.
 - Vizuelni identitet: Škola je bila ispunjena ružičastim detaljima, simbolizujući zajedničko „ne“ nasilju.

Učenici su organizovano gledali film o bosanskohercegovačkim paraolimpijcima Ismailu Barlovu i Ismailu Zulfiću. Film je poslužio kao snažna lekcija o snazi volje, upornosti i rušenju predrasuda, što je ostavilo dubok trag na razmišljanje učenika o mogućnostima osoba s invaliditetom.


Tokom cijele godine, rad Vijeća bio je vidljiv u hodnicima škole. Izrađeni su brojni:

Plakati i tematski panoi koji su pratili svaku od navedenih aktivnosti.

Kreativni prostori koji su služili kao izvor informacija i prostor za izražavanje učeničkih ideja.

Rad Vijeća učenika u ovoj godini obilježili su proaktivnost, kreativnost i visok stepen empatije. Kroz ulogu predavača i organizatora, učenici su razvijali liderske vještine, dok su teme poput sigurnosti na internetu i inkluzije doprinijele stvaranju sigurnijeg i ugodnijeg školskog okruženja.

Koordinatorice Vijeća učenika pedagogica škole Almira Stranjak Šašić i učiteljica Minela Gološ Šuta.



SEKCIJE

RITMIČKA SEKCIJA – ples, ritam i dobra energija

Ritmička sekcija naše škole okuplja oko petnaest učenica iz razredne nastave koje kroz ples, muziku i pokret razvijaju svoje talente, kreativnost i samopouzdanje. Tokom cijele školske godine članice sekcije redovno su održavale probe i vrijedno uvježbavale različite koreografije prilagođene njihovom uzrastu.

Na probama su učenice kroz zanimljive ritmičke i plesne aktivnosti učile pravilno pratiti ritam, usklađivati pokrete i sarađivati kao pravi tim. Posebnu pažnju posvetile su pripremama za školske priredbe, obilježavanje važnih datuma i različite školske manifestacije na kojima su svojim nastupima uvijek unosile veselje i pozitivnu energiju.

Kroz rad u sekciji učenice su unaprijedile motoričke sposobnosti, razvile osjećaj za ritam i sigurnost u javnom nastupu, ali i stekle radne navike, disciplinu i odgovornost. Svaki nastup bio je prilika da pokažu svoju kreativnost, trud i ljubav prema plesu i scenskoj umjetnosti.

Voditeljica sekcije je učiteljica Edina Pehilj, koja svojim radom, strpljenjem i podrškom motiviše učenice da uživaju u svakom nastupu i zajedničkom druženju.



LIKOVNA SEKCIJA

Likovna sekcija okuplja učenike koji kroz boje, linije i oblike izražavaju svoje ideje i osjećaje. Njihovi radovi krasi učionice i hodnike, učestvuju na konkursima i unose vedrinu u školski život. Posebno se ističu radovi posvećeni Danu državnosti i nezavisnosti, vjerskim praznicima, Danu žena i Danu škole, a svaki od njih nosi snažnu poruku ponosa, zajedništva i ljubavi prema domovini.

Sekcija je postala prostor slobode i stvaralaštva, mjesto gdje učenici istražuju različite tehnike, pokazujući da umjetnost može biti most između tradicije i savremenog izraza. Svaki rad je jedinstven trag njihove mašte i truda, a likovna sekcija svojim djelovanjem oplemenjuje školski život i potvrđuje da kreativnost nema granica.



SPORTSKA SEKCIJA

Sportska sekcija razredne nastave tokom školske godine realizovala je niz sportskih aktivnosti s ciljem razvijanja timskog duha, sportskog ponašanja i zdravih navika kod učenika.

U okviru aktivnosti organizovan je Novogodišnji turnir u malom fudbalu za dječake, na kojem su učenici pokazali sportski duh, zalaganje i fair-play igru. Također je organizovan Novogodišnji turnir za djevojčice u igri „Između dvije vatre“, koji je protekao u veseloj i takmičarskoj atmosferi.

Sportska sekcija razredne nastave učestvuje i u projektu UEFA Playmakers – fudbal za djevojčice, koji se realizuje u saradnji sa FK „Emina“. Kroz ovaj projekat djevojčice imaju priliku razvijati sportske vještine, samopouzdanje i ljubav prema sportu kroz igru i druženje.

Sve aktivnosti doprinijele su jačanju prijateljstva među učenicima, razvijanju motoričkih sposobnosti i promovisanju zdravog načina života.

Voditelj sekcije: Denis Hakalović, učitelj



MALI HOR

Mali hor razredne nastave tokom školske 2025/2026. godine okupio je veliki broj učenika koji su kroz pjesmu, druženje i nastupe razvijali ljubav prema muzici i zajedničkom radu. Pod vodstvom učitelja Arnesa Sinanovića, učenici su sa velikim entuzijazmom učestvovali u pripremi i izvođenju pjesama za školske priredbe, svečanosti i različite školske aktivnosti.

Probe hora bile su ispunjene pjesmom, pozitivnom atmosferom i veseljem, a učenici su svojim nastupima uljepšali mnoge školske događaje. Kroz rad u horu razvijali su samopouzdanje, osjećaj zajedništva i ljubav prema muzici.

Svojim trudom, talentom i osmijesima članovi malog hora dali su poseban doprinos školskom životu i stvorili lijepe uspomene koje će dugo pamti.



DRAMSKA SEKCIJA

Glavni fokus rada Dramske sekcije „Mali teatar” u proteklom razdoblju bio je na razvijanju kreativnosti, timskog rada i oslobađanju od treme. Članovi sekcije su kroz redovne susrete radili na:

- vježbama dikcije i scenskog pokreta, poboljšanju artikulacije i svjesnosti o vlastitom tijelu u prostoru,
- improvizacijskim igrama kroz poticanje spontanosti i brzog razmišljanja,
- analizi tekstova kroz razumijevanje motivacije likova i strukture dramskog djela.

Tokom ovog razdoblja, dramska sekcija je uspješno realizirala sljedeće:

- Pripremu tekstova povodom različitih važnih datuma
- Učenici dramske sekcije su prigodnim dramskim tekstovima održali kratke predstave za učenike prvih razreda i učenike produženog boravka.
- Izrađivali su slike za kamišibaj tehniku pripovijedanja uz prigodne dramske tekstove povodom Dana nezavisnosti Bosne i Hercegovine te uz tekst o poznatoj Šantićevoj Emini.

Predstavljali školu na 2. Kamišibaj festivalu u Bosni i Hercegovini koji se održao u Tuzli.

Posebno se ističe visok stepen motivacije i međusobne podrške.

Rad dramske sekcije u proteklom razdoblju ocjenjuje se vrlo uspješnim.

Voditeljice sekcije Mali teatar- Dramska sekcija Maja Kajtaž i Minela Goloč - Šuta



Horska sekcija



Horska sekcija predmetne nastave, sa nastavnicom i voditeljicom sekcije Maidom Marić, kroz ovu školsku godinu broji najviše članova. Učenici su se prijavljivali na ovu sekciju sa velikim entuzijazmom. U sekciji je aktivno učestvovalo preko 60 učenika. Pored pjevanja narodnih pjesama izvodile su se i savremene pjesme koje su učenici pjevali sa osmijehom na licu i srećom u srcu. Druženje, smijeh i prijateljstvo su bili česta pojava ovog hora što je bilo vidljivo i iz dječjih osmijeha prilikom izvođenja pjesama na školskim priredbama.



Ekološka sekcija

Ekološka sekcija je tokom školske 2025/2026. godine ostvarila brojne uspjehe i realizovala značajne aktivnosti koje su doprinijele ljepšem i zdravijem školskom okruženju. Posebno smo ponosni na nominaciju naše škole za jedinu „zelenu školu“ u Hercegovini, što predstavlja veliko priznanje za trud i rad članova sekcije.

Učenici su aktivno učestvovali u projektima i radionicama u saradnji sa lokalnom zajednicom i Udruženjem građana „Nešto Više“, kao i u različitim takmičenjima, ekološkim akcijama i zajedničkim aktivnostima sa drugim školskim sekcijama. Podršku radu sekcije pružilo je i Vijeće roditelja, koje je učestvovalo u realizaciji pojedinih projekata.

Jedna od najznačajnijih aktivnosti bila je akcija čišćenja i uređenja školskog dvorišta, zahvaljujući kojoj je prostor naše škole postao uredniji i ljepši za sve učenike i uposlenike.

Za uspješan rad Ekološke sekcije zaslužne su nastavnice Alisa Trbonja-Kahrman i Alma Salčin te učitelji Arnes Sinanović, Mirela Tipura i Sanela Džinović Bijedić, zajedno sa vrijednim i angažovanim članovima sekcije.



Medijska sekcija

Medijska sekcija je tokom školske 2025/2026. godine pratila i bilježila najzanimljivije događaje, aktivnosti i uspjehe naše škole kroz fotografije, video sadržaje, objave i školske projekte. Kroz rad sekcije učenici su razvijali kreativnost, timski duh, komunikacijske i organizacijske vještine, stvarajući uspomene koje će obilježiti ovu školsku godinu.

Članovi sekcije aktivno su učestvovali u izradi školskih novina Zlatno pero, uređivanju školske web stranice, vođenju školskih društvenih mreža Facebook i Instagram, kao i pripremi promotivnih materijala, postera i pozivnica za školske događaje i priredbe. Posebnu ulogu imali su u medijskoj podršci školskim manifestacijama, takmičenjima i priredbama, kroz fotografisanje, snimanje i pripremu sadržaja za objave.

Kroz različite projekte, radionice i druženja učenici su stekli nova iskustva i uživali u svakom trenutku provedenom na sekciji. Pored rada i obaveza, medijska sekcija bila je mjesto prijateljstva, smijeha i zajedničkog stvaranja lijepih uspomena.

Voditeljice sekcije su nastavnice Mersiha Šuta i Elvedina Kazazić.



Dramsko-historijska sekcija

Dramsko-historijska sekcija tokom školske godine realizovala je brojne kreativne i edukativne aktivnosti. Učenici su učestvovali u pripremi i izvođenju dramskih tačaka povodom značajnih datuma, kao što su Dan državnosti Bosne i Hercegovine, Međunarodni dan maternjeg jezika i Dan nezavisnosti Bosne i Hercegovine. Organizovane su radionice, literarni i recitatorski nastupi, priprema historijskih sadržaja i prezentacija, kao i posjete kulturnim ustanovama. Kroz rad sekcije učenici su razvijali kreativnost, govorne vještine, timski rad i ljubav prema historiji, jeziku i kulturnoj baštini Bosne i Hercegovine.



LITERARNA SEKCIJA

Literarna sekcija okuplja učenike koji kroz pisanu riječ razvijaju maštu, kreativnost i ljubav prema književnosti. Učenici redovno učestvuju na literarnim konkursima, obilježavaju značajne datume i kroz različite aktivnosti njeguju kulturu čitanja i izražavanja.

Posebno je svečano obilježen Oktobar – mjesec knjige, tokom kojeg su organizovane brojne radionice, čitanja, literarni radovi i kreativne aktivnosti posvećene knjizi i književnosti.

Sekciju uspješno vode nastavnice Selma Mujan i Nina Džiho, koje svojim radom podstiču učenike na stvaralaštvo, razvijanje talenata i ljubav prema pisanoj riječi.



Nenin zagrljaj

U njenim rukama miriše blagost,
svaka je riječ topla i draga,
nenin je osmijeh najveća radost,
što preko našeg prelazi praga.

Čuvar je tajni i starih priča,
uz nju je srce uvijek na mjestu,
najljepše biće što život krasi,
na našem dugom, zajedničkom putu.

Azra Čaušević, IV b razred



Iz pera naših učenika.....

Prijateljstvo

Kažu da je prijateljstvo jedno od najljepših blaga koje čovjek može imati. Ja vjerujem da je to istina, jer kada imamo pravog prijatelja, svaki dan je veseliji, a svaka briga manja. Sa prijateljem se radost dijeli, a problemi postaju lakši.

Sjećam se jednog kišnog dana kada sam stajala ispred škole i gledala kako kapljice tiho padaju na zemlju. Zaboravila sam kišobran i nisam znala kako ću stići kući. Tada je moj prijatelj prišao, otvorio svoj kišobran i rekao: „Hajde, ići ćemo zajedno.“ Taj mali trenutak pokazao mi je koliko je lijepo imati nekoga ko misli na nas i želi nam pomoći.

Prijateljstvo znači pomagati jedni drugima i dijeliti lijepe trenutke. Sa prijateljima se igramo, učimo, razgovaramo i smijemo se. Zajedno stvaramo uspomene koje ćemo dugo pamtit. Oni nas razumiju i raduju se našim uspjesima kao da su njihovi.

Kada pogriješimo ili smo tužni, pravi prijatelj nas ohrabri i kaže da pokušamo ponovo. On nas podsjeti da nikada nismo sami. Sa prijateljem je svaki smijeh glasniji, a svaka briga manja.

Prijateljstvo se gradi na povjerenju, iskrenosti i dobroti. Važno je da budemo pažljivi jedni prema drugima, da pomažemo i govorimo lijepe riječi. Nekada je dovoljan osmijeh ili mala pomoć da nekome uljepšamo dan. Pravi prijatelj je neko ko u nama vidi dobro čak i kada mi sami u to posumnjamo.

Ja vjerujem da je prijateljstvo poput cvijeta. Ako ga negujemo dobrotom, pažnjom i poštovanjem, ono će rasti i biti sve ljepše. Pravi prijatelj je kao zvijezda možda ga ne vidimo uvijek, ali znamo da je tu.

Zato mislim da je prijateljstvo jedno od najvećih bogatstava u životu. Dok god imamo prave prijatelje uz sebe, naš svijet će uvijek biti ispunjen radošću, smijehom i toplinom.

Amina Zolj, IVb razred


LIFE IS
BETTER
WITH
FRIENDS







ART STRANICE











EKSKURZIJA za pamćenje

Budva,
13 – 15. maja
2026. 

Tri dana smijeha,
druženja
i avantura koje ćemo
još dugo pamtiti!

I nakon svih
dugih vožnji,
rasprava, kiše
i haosa u
autobusu,
sigurno je da će
nam ova tri dana
dugo ostati
u sjećanju.



TREBINJE

Prvu pauzu napravili smo u Trebinju, a nakon toga nastavili smo prema Herceg Novom gdje smo imali slobodno vrijeme za obilazak grada i uživanje u pogledu na more.



*Smijeh,
druženje,
nezaborav
ni trenuci!*




KOTOR

Izlazak iz autobusa na trajektu bio je poseban doživljaj, a Stari grad Kotor izgledao je kao pravi labirint prepun uskih ulica i prodavnica.



BUDVA

Stari grad, kupanje u moru i nezaboravan noćni život – Budva nas je oduševila!



PUTOVANJE KOJE POVEZUJE



Dugi sati u autobusu, pjesme, šale o gibanici, rasprave oko muzike i himna ekskurzije “A.C.A.B.” od Bruda – sve je to dio priče koju ćemo prepričavati još dugo!



ZAHVALA

Posebnu zahvalnost upućujemo našim nastavnicima i direktorici koji su svojim trudom i podrškom učinili ovo putovanje sigurnim, lijepim i nezaboravnim.

Pripremila: Nadia Mišić IXB

IZLET NA RUIŠTE

Učenici drugog i trećeg razreda

Učenici drugog i trećeg razreda naše škole proveli su nezaborovan dan u prirodi na Ruištu. Kroz druženje, igru i boravak na svježem zraku uživali su u ljepotama prirode, stvarajući uspomene koje će dugo pamtili.



DAN ISPUNJEN:

- ✓ druženjem i smijehom
- ✓ šetnjom i istraživanjem prirode
- ✓ igrama na otvorenom
- ✓ učenjem kroz igru i zabavu



Druženje u prirodi

Dan za pamćenje

Učenje kroz igru



ZABILJEŽILI SMO
NAJLJEPŠE TRENUTKE!

Pogledajte naše osmijehe i čarobne prizore prirode.

ZAUVIJEK U
LIJEPOM SJEĆNANJU

Ovaj dan ćemo pamtili po druženju, smijehu i ljepoti prirode!



92
„Najljepše uspomene nastaju izvan učionice.“


Izlet učenika IV razreda
HUTOVO BLATO
STOLAC



Učenici IV razreda proveli su nezaboravan dan istražujući prirodne ljepote Hutovog blata i bogatu historiju Stoca. Kroz druženje, učenje i boravak u prirodi nastale su uspomene koje će dugo pamtili.



- ✓ Vožnja čamcem
- ✓ Priroda koja oduševljava
- ✓ Zajedno stvaramo uspomene
- ✓ Učenje kroz izlet
- ✓ Dan ispunjen osmijesima



„Najljepše uspomene nastaju izvan učionice.“



Izlet učenika VI i VII razreda

MOSTAR - SARAJEVO - IGMAN

VI RAZRED

- Sarajevo
- Zemaljski muzej
- Pionirska dolina
- Igman



Učenici VI razreda posjetili su Zemaljski muzej i Pionirsku dolinu, a potom su na planini Igman uživali u ručku, druženju, zabavi i prelijepom ambijentu. Učenici VII razreda obišli su Titov bunker u Konjicu, nakon čega su se pridružili učenicima VI razreda u Pionirskoj dolini i na Igmanu, gdje su zajedno proveli nezaboravne trenutke ispunjene smijehom i lijepim uspomenama.

VII RAZRED

- Titov Bunker-Konjic
- Sarajevo
- Pionirska dolina
- Igman



NOVA MJESTA

NOVA ISKUSTVA

LIJEPE USPOMENE



Izlet učenika

VIII razreda

JAJCE



Učenici VIII razreda proveli su nezaboravan dan na izletu u Jajcu, gradu bogate historije, kulturne baštine i prirodnih ljepota. Tokom posjete obišli su poznati vodopad, srednjovjekovnu tvrđavu, Plivska jezera i mlinčiče te Muzej AVNOJ-a, upoznavajući značajne događaje i znamenitosti koji su obilježili prošlost ovoga kraja. Kroz druženje, istraživanje i zajedničke trenutke izvan učionice, učenici su stekli nova znanja i stvorili uspomene koje će dugo pamtili.



NAŠ DAN U JAJCU



Posjeta poznatom vodopadu



Obilazak stare tvrđave i gradskih znamenitosti



Upoznavanje bogate historije grada



Posjeta Plivskim jezerima i mlinčičima



Druženje i stvaranje novih uspomena



Najljepše uspomene nastaju na putovanjima koja dijelimo zajedno.



ODJELJENJA U ŠKOLSKOJ 2025/2026. GODINI



Ia JU „VI OSNOVNA ŠKOLA” MOSTAR šk. 2025/2026.



Ib JU „VI OSNOVNA ŠKOLA” MOSTAR šk. 2025/2026.



Ila JU „VI OSNOVNA ŠKOLA” MOSTAR šk. 2025/2026.



Ilb JU „VI OSNOVNA ŠKOLA” MOSTAR šk. 2025/2026.



IIla JU „VI OSNOVNA ŠKOLA” MOSTAR šk. 2025/2026.



IIlb JU „VI OSNOVNA ŠKOLA” MOSTAR šk. 2025/2026.

ODJELJENJA U ŠKOLSKOJ 2025/2026.GODINI



IVa JU „VI OSNOVNA ŠKOLA” MOSTAR šk. 2025/2026.



IVb JU „VI OSNOVNA ŠKOLA” MOSTAR šk. 2025/2026.



Va JU „VI OSNOVNA ŠKOLA” MOSTAR šk. 2025/2026.



Vb JU „VI OSNOVNA ŠKOLA” MOSTAR šk. 2025/2026.



ODJELJENJA U ŠKOLSKOJ 2025/2026.GODINI



Vla JU „VI OSNOVNA ŠKOLA” MOSTAR šk. 2025/2026.



Vlb JU „VI OSNOVNA ŠKOLA” MOSTAR šk. 2025/2026.



Vlla JU „VI OSNOVNA ŠKOLA” MOSTAR šk. 2025/2026.



Vllb JU „VI OSNOVNA ŠKOLA” MOSTAR šk. 2025/2026.



Vllla JU „VI OSNOVNA ŠKOLA” MOSTAR šk. 2025/2026.



Vlllb JU „VI OSNOVNA ŠKOLA” MOSTAR šk. 2025/2026.



JU „VI OSNOVNA ŠKOLA“ MOSTAR GENERACIJA 2017/2026.



Edna Isić-Balić
Direktorica



Adisa Obhodović Džibetović
Razrednica



Nina Džibo
Razrednica



Ademir Alantić
Razrednik




Dženifa Pejak
Razrednica



Edina Pehljić
Učiteljica



Mhnela Gološ Šuta
Učiteljica



Neja Čerčić
UČENICA GENERACIJE



Vanja Balavac



Ema Baraković



Anel Branković



Edif Čampara



Jan Đonko



Đerme Fillibeli



Lejla Hadžionerović



Adna Hidović



Eja Husković




Džan Kajtaž




Emir Kevelj



Hana Kovač



Sanj Kosarić



Daria Pajić




Asja Topić



Nela Vite



Dalal Spahalić



Mak Torlo



Dejan Bajrić



Nela Baralija



Zara Čurić



Selma Divizac



Asja Džanković



Isar Elezović



Eja Hadrović



Dino Costo



Nada Husković



Zara Jusupović




Sandi Kajtaž



Džan Ljvrljak



Lejla Maksimović



Anis Musić



Sara Sivonjić




Matti Pirlejn



Omar Udović



Nadia Misić



Zaid Macić



Helena Perović



